





5-6-72

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---

PL            Wang, Shên-chung  
2698        Wang Tsun-yen chi  
W413  
1682  
v. 3-4

East Asia



#100

V.3





PL  
2698  
W413  
1682  
V.3-4



王遵巖集卷之六

晉江王慎中道思著 後學張汝瑚夏鍾選

書

與江午坡書

踈問久矣。若甚闕然。徒有此心而已。聞兄家居。行峻跡高。皎然塵埃之外。寡與人接。旣爲潔淨如此。其所得宜有過人者。僕甚欲聞之也。僕嘗愛漢人不夷不惠。可否之間。論伯夷之隘。至於舉世可惡。柳下惠之不恭。則鄉人無不可狎。此於人已之間。尚不能無失。惟持其間而已耳。故僕之所處。固不能盡與鄉人



偕而亦不見甚有可去之人。此吾之所志也。以彼二  
子所造之至。猶不免有隘與不恭之弊。吾之頑鄙。乃  
欲兼用其長。兩去其短。宜其各無所得。清和之名。交  
失而隘與不恭之訕。並集於身也。然吾終不敢以此  
悔其所志。惟當咎其修之不勤。踐之未實。而益勉以  
求成耳。僕所處得失如此。聊舉以告。以當面質。兄必  
有以教我也。居閒讀書。觀古人之言。得其用心之所  
存。恍然若與其人並世而生。同席而議。決然不敢徇  
近儒之是。而阿流俗之好。此率難以具於書。且亦知  
非兄之所欲。急聞者。其作爲文字。法度規矩。一不敢



背於古而卒歸於自爲其言此在前世爲公共之物  
而在今日亦爲不傳之秘欲以語人都無曉者尤思  
與兄道之昨因幸晤令兄少峰先生稍進其說屬其  
歸以相告以求有合吾文尚未錄往而洪君之作爲  
之先洪君之文固僕所畏以爲不可及而於古有合  
者也兄若有契於洪君吾之文當繼往如其不然則  
當藏之以待他人矣中泗草堂尚缺文字緣未明泗  
字之義此小節曾畧評之少峯以告肯聽否無恨欲  
言何由得悉

夏鍾曰前半說爲人之道後半  
說作文之法只是斟酌得中耳



與江少峯書

以僕思見兄知兄亦欲見僕然僕蹤跡不礙自可行  
遊而兄守官有次難以自便是吾二人之不得相兼  
其責在僕也兄莆中良友相知本自不少不徒見兄  
因得他訪豈不爲樂顧坐守一室失此勝晤捧札慨  
然祇用增歎耳九鯉麥科尤名奇絕不徒訪晤庶得  
覽觀興言及此身住心馳尚冀因兄在彼誘我佚興  
追此情誦也俟努力圖之伏讀閩游雜詠雄調麗藻  
蕩耀心目底滯閉塞之久忽焉開發何快如之過南  
平縣一首直與古人並驅敘情陳事軼宕古雅少陵



昌黎未分高下也。觀競渡末聯書坊避暑禪寺頸聯  
託意婉曲。造語工鍊。唐元白集中亦是佳句矣。武夷  
山歌直以信州龍虎山相匹。云無間然。恐不得爲定  
論。兄信州人。過占地位。便欲吾閩武夷與貴鄉龍虎  
同價耶。呵呵。投檄徑去之說。終涉過高。恐此意橫胸  
中。觸事易露。接見監司撫臨吏民。或不免有作意處。  
便是此一語作種子。故長枝葉也。僕未見兄。輒妄有  
論。本緣相愛。又恃相知。得盡其說。倘所億不中。則失  
言之咎在僕。更爲幸也。有便不吝見示。爲望。午坡兄  
聞已有三子。更復何求。中泗草堂不知作何面勢景。



象尚缺一賦也秉燭草草

夏鍾曰有投檄徑去之意橫胸中便觸事易露處  
上下之間不免有作意處當時士大夫多坐此病

荅宋仲石

側聞榮拜膳部深爲喜慰自侍公教每聞尊語云惟  
得一禮曹主事以爲至願而恐不可得雖公謙言知  
出本心今旣如所願僕最蒙公知愛者寧不爲喜自  
此優游清暇益勉所學僕向者所望於公以古人之  
正傳當世之大用皆可坐進矣其日閱報二喜併得  
以道原爲儀制故也儀制固清曹僕豈敢以吾弟得  
近清華爲喜以其得與公爲寮爲喜也公之愛我始



以吾弟故而終之。知我實不由於弟。今公之教我弟也。當以我故。然及其相勉以進相與以樂也。又自有味而不以我爲兄故矣。僕之喜如此。宜公所信。公既自喜。又當爲我喜也。芳洲愛公信公。可謂至矣。此行倘當路有意大賢。留置北曹。或得爲禮部。則公與吾弟之喜。又何可量。而僕當得三喜矣。僕絕不敢作京貴交游書於公。不免有此。此後恐不敢再通。惟寄聲吾弟致意。公欲知我亦從吾弟處問之可矣。別後作得文數篇。皆不爲苟。尤爲芳洲所印。可因寫稿以去。公如欲見。就芳洲取觀之。詩漫錄一卷往覽。此非尊



意所欲得者。然僕既以文字爲公所推。因之締好。則亦當備此於左右耳。

夏鍾曰  
淡而真

與林觀頤

僕所爲文。求合乎古而已。初不求時人之知也。然文字既出。不免爲時人見之。則莫不以爲迂腐朽爛。羣譏而簇笑。韓昌黎所謂直何用於今世者也。不曉足下何所取而好之篤。且過爲推褒。加之以所不當蒙。非獨與我同好而已。若將就僕而學爲如是之文。竊觀足下之意。何其與時人異也。僕廢於時久。權力不



足以助推挽品藻不足以濫吹噓。足下非有所求於僕者也。意者人情炫名而慕遠。中無所得而苟悅其號耶。觀足下之文。已能不爲時人之文矣。宜於古知所用心者。炫名慕遠不足以料足下也。不惑於名。無待於求。足下於僕之文。誠好之耳。今時所謂學官弟子。攻所業以應有司之舉者。舍可以得有司。則不復過而問古之文。非所以得於有司之具也。足下獨爲之於衆人不爲之中。其用意良異於時。此僕所求於今之士。欲引與共進。而收以自輔者也。足下乃不遠千里。馳書見貽。意勤而詞遜。僕雖自知不足副足下。



之望亦安敢無以爲答而孤重賜乎。所爲古文者。非取其文詞不類於時。其道乃古之道也。古之道不謀祿利。不希榮進。足下所謂夢寐古人。顧戚戚於旣失。汲汲於後獲。何其與古之道異也。足下之好古文。直好其詞。不類於時耳。如是則其用意亦何以異於時。故僕願足下姑置得失。而專力於道。苟於道有得。雖不吾問。足下將自得之。僕將往求足下而告之。不獨以有告。且又將困足下而有所學。僕又安敢傲然當天下之勤意。遜詞而無所憚耶。願足下勉之。毋忽。詩一首奉贈。聊以報共好之雅。雜文數篇。皆偶于刻本。



其他未及錄。非謂欲俟足下有得而後往也。繼此有便。毋惜惠音。

夏鍾曰。與韓退之李習之相去不遠。

上嚴介谿宗伯

嘗觀宋朝嘉祐治平之間。稱爲盛時。謂諫官得職。而人主能受言也。今讀當時諸人彈事奏狀。類多掇拾煩碎。不關大體。或抵撫大臣。疑似之迹。闇昧之事。流游之言。訐而發之。以爲無欺不避。至有爲誣與憤者。而人主不爲別白。惟務含容。大臣固不以煩言衰眷任。諫官猶仍職守位。不加斥罰。而所謂大臣者。亦以



體貌自崇不爲皦皦悻悻之節。以爭於上。雖其政未  
合乎古。而其氣象之廣大。可謂上下兩得。大小各盡  
者矣。此其所以爲盛與。自嘉靖六七年以來。臺諫之  
臣。往往以言獲罪。故人亦以言爲諱。而士夫之心。亦  
深以爲憂。夫所謂言者。豈必其皆中。而無可罪。然使  
人以是爲諱。則可憂矣。伏見一二年間。言者稍稍得  
進。以爲盛矣。而乃有致疾於公者。得無有掇拾抵撫  
之爲耶。是可駭也。然主上不以是疑公。上大夫不以  
是議公。公亦不皦皦幸以爭於上。獨厚自引。抑求去。  
以明言者之無罪。主上益信公之不謙。而重其任。然



則言者固宜亦諒公之無猜而平其心矣。所謂上下  
兩得而大小俱盡者。非今日與。是以某不暇恨公之  
見誣而方幸斯時之爲盛。是公以一身受爲理之惡。  
而使天下之人。曉然知主上有受言之美。雖其不中  
而不譴。則其有益於時。而光顯主上之德。豈有量耶。  
伏願公益懋明德。以喻於海內。則主上之眷宜有隆。  
無替言者之嘵嘵。安知不反而爲稱頌榆楊之舉耶。  
某辱知教有年。僭謂關憂喜於明公。是以敢進其說。

夏鍾曰。若吞若吐。忽抑忽揚。藏譏誚于稱譽  
之中。寓怒罵于寬慰之間。更使人難受矣。

上李序菴閣老



某生也。晚竊聞長者之論。由高帝文皇以後。稱相業者。莫盛于三楊。三楊相宣宗。值重熙累洽之運。機務簡寡。宸極優游。然而三公猶且殫竭勞瘁。若不暇給。蓋制度禮文。文貞擅其長。而文敏或莫能贊。兵旅將帥。文敏騁其智。而文定有所不及。此亦足以明相業之難。而國事之不易于獨任矣。今明公爲相。雖遭時熙洽。不殊先世。然而主上銳情政理。宵旰厲精。稽古禮文之事。百爾具舉。至於禦閱旅之畧。理財足國之方。明刑詰姦之典。莫不刮剔蒐獵。極其樞機品式之周。視三楊時益多故矣。而公挺然以一身任之。無



不當於上心而協國是非惟其酬應之能給而從容  
鎮定安若無事之氣象滿于四海之視聽然則後乎  
此者欲論世尚賢則稱相業者又當不談三楊矣豈  
不盛哉豈不難哉古者三公並設無其人則不必備  
以明公一身而其輔主佐理之功章章若此信乎其  
不必備也儒者之論曰人主之職在論一相而已信  
乎其無待於多論相也某遷竄之餘不足以談當世  
之務念惟往日叨備末屬謬荷知遇實未敢忘長者  
之賜茲者承乏山東視學之職又辱汲引之大惠顧  
惟無可以報于門下而致其區區之虛詞蓋以求道



於情至而事不從之非。而公往者所以謬垂一日之知者。固亦在乎此也。不宣。

夏鍾曰。救時相亦無幾。評品三楊而曰相業之難。國事不易于獨任。曰不必備。曰無待于多論。相隱有諷其集思廣益之意。

再上顧未齋

某少無師承。師心自用。妄意於文藝之事。自十八歲。謬通仕籍。卽孳孳於觚翰方冊之間。蓋勤思竭精者。十有餘年。徒知掇摭割裂。以爲多聞。模効依倣。以爲近古。如飲酒方醉。叫呼喧呶。自以爲樂。而不知醒者之笑于其側而哀之也。溺而不止。已成棄物。天誘其



喪不卽淪隔二十八歲以來始盡取古聖賢經傳及  
有宋諸大儒之書閉門掃几伏而讀之論文釋義積  
以歲月忽然有得追思往日之謬其不見爲大賢君  
子所棄而終于小人之歸者誠幸矣愧懼交集如不  
欲生乃盡棄前之所學潛心鑽研者又二年於此矣  
若使得當世之大賢君子養深學正爲鉅儒宗如公  
者而事之質其所疑濯舊聞而開來益則於斯文或  
可庶幾而賦分蹇薄方操案牘以苟升斗之祿不得  
專一其思慮而瞻望明公相去之遠如泥塗雲霄邈  
不可卽無復捫待門闌之日循心自歎知終不能以



有成矣。顧惟惓惓知所向方之心。異于往日之狂迷。冀公之見察。而不敢自外。故輒書其近日所爲詩文二種數十首以獻於門下。伏惟矜其志。察其誠。而是正之。歟。且不朽。

夏鍾曰先生自述其生平爲文虛心能改如此則夫世之自夸爲多聞爲近古者亦可廢然而反矣

與李三洲書一

頃從淨峰公處見所屬吏士所爲此公紀述大征之文。皆意義猥陋。詞采謬劣。真不足以鋪張盛美。揚厲壯鉅。文字之學。不講于世。其誤不淺。楊雄贊趙充國。韓愈紀平淮西。猶云近世詞章之事。如胤侯征羲和。



伯禽平徐戎僖公服淮夷與夫宣王中興而申甫樊  
謝諸卿之功使不見於詩書孔子雖欲存之以爲後  
世法亦何所考據而傳之耶僕謂淨峰公之功烈既  
已不減吉甫方叔而作者無人何以婉隆周雅載之  
無窮也不獨如此也周人有雅而宣王之興始有考  
於後今作者無人何但人臣之美不著而已且無以  
昭聳有明之功德於漢唐之表尤可憾耳今此公又  
當與公共底平蠻之績楚多才士宜必有能著其美  
者僕竊願見之幸無惜一示及也僕之文極不爲今  
時所好常欲存之以示後不意公獨好之故聊及之



三  
以資經武之暇之一談。不然此言也。其不爲妄且易  
與晉人之言善爲師者。好以整又好以暇。度公之整  
且必有暇也。故論之如此。幸有以教我。僕將因以知  
公之暇也。

夏鍾曰作者無人使一代君臣之美  
不彰關係匪小宜先生之三致慨也

其二

公在邊有征誅之謀。籌兵筭口。諸務方棘。在他人處  
之。宜嚴戒徭。不遑朝夕。公獨能論文觀理。窮眇造  
微。有講習之益。如在氍茵燕息之間。信可慕也。僕前  
啓有能整而暇之說。以今觀之。公之整也。甚能暇矣。



僕嘗言俎豆之中有軍旅。蓋其精神嚴固。志意堅率。可以周乎經曲千百之中。而不亂。則所以三軍敵千萬人者。是此事也。衛靈自以陣法爲問。殆謂王孫賈輩之所治。此豈孔門之學。而所謂聞俎豆之事者。自以正對。非婉辭以爲拒也。當時衛公旣不悟。後世儒者亦復謬解。于是軍旅俎豆判爲二事。而雍容細謹。爲文儒之習。暴厲悍忮。爲武人之長。蓋道之不明如此。何意於公一明。茲惑淨峰。蓋已進于此道。公與共事。尤爲奇特。湖南之功。知非二公難事。所示文評。足欽高識。僕爲此文。實不期有能好者之出于今。要以



待於天耳何意有公與我同好也其敢不爲公盡方  
欲詳論而使者立于庭不能少畱半日故未引其端  
俟端錄拙稿訪便寄去併爲一論之也

夏鍾曰整故能暇俎豆  
之中有軍旅自是至言

其四

高賢同時而不相知者自古有之或學術講明源流  
迥別或事功建立規模絕殊然要兩不失爲賢耳又  
有兩賢相知而偶以共事意氣論議一冰一炭至于  
事已論罷輒若金蘭此皆古人之所有果其爲賢正  
不在於事事牽合言言照應也僕於公與淨峰公幸



辱一日相與之雅竊知二公之皆爲賢者也湖中征  
苗之役一冰一炭僕不以爲忤盖古人有如此者然  
不知二公意中能絕無所介而權若平時否嘗有客  
過我草堂談湖湘之事云淨峰之功且成者客曰此  
大非李三洲所喜吾艷然不悅以爲何待賢者之淺  
大抵俗士無識徃徃以已心度君子真可笑也僕旣  
斥客復舉以似公夫異同起于國事而平生契誼不  
爲之損非公之賢其孰能之僕非知公之深亦不以  
及也客又有談公與張公一在官中一在家中各絕  
口不談及前事此雖氣象深厚體段凝遠然又近於



有意○者○僕○亦○以○爲○不○必○如○此○也○不○知○公○亦○以○爲○何○如○  
平○生○惓○惓○仰○慕○之○心○欲○公○卽○出○以○膺○當○世○之○責○而○見○  
吾○道○之○行○實○如○饑○渴○臨○紙○殊○不○得○盡○伏○惟○有○以○教○之○  
不○宣○

夏鍾曰賢者必事事牽合言言照應固雷同厭目  
然使冰炭相仍恐亦不免議論多而成功少也  
與應儼菴書

昔人論朝廷方隅之緩急○比於腹心手足○如公之重○  
不使居中宰制○崇護腹心○而膺方隅手足之寄○宜天○  
下所缺望也○然手足有疾○未聞腹心得以晏然○無事○  
則公今日所受之託○豈可謂非天下之急哉○自嶺南○



開府設大臣經略以來名臣相望而事業俊偉勲業可紀莫如韓蘇州王陽明公變化運用之妙固在精神難以按圖求駿然規畫措置亦必有跡或可講求見之施行未必無所助于經略之一二也近聞鄭韶州有不得於職拂衣去郡此公最爲不欺其心能自信其所守者官雖蹭蹬而其人品固同年中之賢者公在彼而不能伸一老同年之志竊以爲公有責矣不獨同年之私也嶺南爲郡才力或有出韶州上者自守不變未必有加之者公在彼而使賢守不得終其治又恐天下有以歸責于公也今時耳目重官位



忽人品便謂一僻郡老守欲去則去何足深置論不知古人重事體有一小吏賤僚之去就而係於政俗之得失者亦不敢輕豈可隨時耳目不以爲意也弟廢人也不宜妄言唯于公可一發其妄耳非公亦不能諒其愚也冬來嶺外氣候彌佳伏審道躬有相餘不一

夏鍾曰重官位忽人品小吏賤僚何以爲鼓舞之地可慨可慨

### 與項甌東

僕所遣人還自三山得奉答書甚慰方遣人時正與洪君語度其不及不意及也而公于治行匆匆之際



復教詳至如此。不但仰感情誼之殷。又以竊知有道者所養。從容暇豫。終身無造次之時。與所謂前定而不困者。固此事也。來教所云孔老異同。而爲文者不當雜出於老子。而當一於孔氏之言。其所及孔氏之得失。雖未得其清要。而欲學者一於此。而不出入于彼。義則正矣。老氏得失。今未暇答。公書本非爲老氏發。故亦不必答也。惟所以論爲文者。其義雖正。而于識不爲達也。文之爲道。固博取而曲陳。惟其所以取之者。雖博而未嘗不會於吾之極。故謂之約。其陳之雖曲。而其義有中。則曲而不爲雜。南人周任之言。每



舉於孔子。以孔子之聖。豈不足以矢口爲言。而於前人之言。時有舉焉。所舉有前人之言。而其意則吾之所欲言者矣。龍子公明儀之言。徃徃迭見於孟子。而陽虎之暴。其言亦有可以發者。老氏之賢。固加於周任。公明儀。龍子。而南人之陋。陽虎之暴。又不論矣。惟其有取於老氏。而皆出於孔子。此所以爲學孔子者之爲文者也。今稱述必在乎經。援引必則古先王。如書生科舉之文者。豈不爲正。而豈可以爲文。而亦豈可以謂之知道者哉。有甚似而寔非。有太反而正合。非獨文然。凡人之事業功行。皆若此矣。非公之明。何



以語此義則序已付黃生入梓矣先此呈覽僕於此亦自謂不爲苟言者公得無又以其雜出於莊周而病之耶有以見教毋惜便風千萬之望

夏鍾曰周任公明儀龍子以及南人陽虎之說孔孟猶取焉則爲文者卽雜出于老氏亦不得爲失正不然道德五千言俱當束置高閣矣

### 與蔡鶴峯

十餘年景慕高風一旦得見顏色其爲慰幸何可喻云惜相見不多其見時又皆有他客未及詳扣微言以領精意然薰炙容氣猶足以祛躁客也承使至賜之教言伏讀其中有云今人好說心云此等言語



僕每見一二前輩好道之。其意若欲爲徹切。不知實是太爲鶻突。學者於道。貴在著察。正如此言。不但於人無以致其喫緊。且於其身正坐顛預也。來教云。顧存心力行何如。僕正欲反詰公。如何存心力行也。且夫說心而不知存。說知行合一而不能行。固非學者。今有自謂存心。而實強制。自謂力行。而實冥趨。公亦有以辨之否。又如來教所舉理會氣象之語。竊謂此語亦須善體。乃不誤人。夫箕踞夷蹲。足驗不恭。跣走噉呼。可知非靜氣象。德性實非兩事。所當理會。然實際用工處。正當有辨。如前賢之意。不免防之于外。檢



之于動以致飾爲善養以矯揉爲操持正使終日之  
間頭目手足之容皆直端重恭而已墮于色莊令色  
之學其視正顏色而斯近信動容貌而斯遠暴慢者  
何啻霄壤也此學不明爲日已久非不學者之不明  
正由名爲學者而皆牽纏文義拘滯形器天載之神  
未嘗一時呈露於出王游愆之間故終日習行而卒  
謂之不知道也公克養積累醇備至到至於幾希毫  
厘而千里攸繫此等辨之不精便爲非道道一而已  
同則是異則非安得置此勿論而自謂爲存心謂爲  
力行吾恐其所存者非其本心行其所行而非吾之



所謂行也。區區之意。願公于此精之。又精盡。濯舊見。以開新益。則向日之所充養者。皆爲實得。而此道不孤矣。草次所答不詳。

夏鍾曰。氣象德性實非兩事。與先儒制其外以養其中相參。

與黃曉江

兄遣語奇崛險刻。自有一段出塵之氣。成其爲隱者之言。若文從字順。聲比律諧。自難以一一論也。故予於兄之請。但取其過人者。而不復置論其間。茲示聯句。尤制作中之末事。更勿用詳評。况又最短於此。亦何以相正耶。必欲不虛見命。則亦有可論者。大抵對



聯只是品題形容某山水某臺寺之風物景象不合  
把自家意思來用。惟自題齋舍室廬則有之上洞對  
云濯足未成星海去振衣間嘯聞風來此純是說自  
家矣。當易無疑如愛其句佳不忍棄則足成一絕留  
題壁間可耳。贈吳道士聯以玉屑對庚申非徒不得  
道家經典元無玉屑之文乃妄杜撰。三彭對一洞尤  
不得妄意欲易之曰甲子欲言雙樹知蓋云欲問吾  
歲若干請觀雙樹耳。蓋樹古則歲閱多也。但雙樹是  
佛家事。莫若雙鶴知似爲無憾。令威化鶴本仙家事。  
鶴固壽屬可以諭年也。南臺一聯如封閣住甚生地



中日月意雖未嘗不可會。而語已難通。不如人間日月字面平正。且不論也。然到山高則無味。山本是高。何須着此模寫。若云人間日月。此中間則語不迫而味可想。如此當盡換却母句。不審於尊意云何耳。細故間費此評論。病中未敢有作。聊以解煩煩。故不覺刺刺盈紙矣。可否見示不妨也。

夏鍾曰錄此見先輩論文不輕恕人處

與鄭海亭

吾子所與于蕙川人書。因後書見示。始往取而得之。向遣人候于時。未見此書。故不及唁喪子之戚也。人



生遭此直是東門哭乃能不悲吾輩自有性情焉有  
頑然不痛者耶要當以理命自勝勿爲所累乃不失  
正此際最是工夫勿云常情細事也向聞應常州已  
考績入都會因朝覲人便寓書問之如子所示則書  
莫由致矣有歐巡撫便新識應常州士之相得固非  
苟然取人與取於人皆必有道今人但言受知于人  
者之難而不知知人者之尤爲不易且如吾子爲政  
受毀固多然使彼毀者數輩盡變而譽子亦不足爲  
子重吾輩須認得此意端的始能不奪所守而淫于  
俗喜怒哀樂中節爲達道而又有聞譽不喜聞毀不



懼之說無乃近于木石其心而非情耶。彼以爲其毀我者固不足懼。而譽我者固不足喜。如使賢者譽之。毀之。亦豈有不喜不懼者哉。善者好之。不善者惡之。非但觀人。君子自考。良亦若此。吾子以爲何如。予近來讀易補見聖人之用。追念昔者所處所履。何以免於災戾。大抵乾震之卦。必多危辭。雖乾六爻亦不言吉。至於用九。言其所以用剛之法。然後稱吉。德已龍矣。亢則有悔。乾健知險。坤順知阻。此何等作用。而其歸只在吉人。躁人之詞多寡。此爲老子知雄守雌。大辨若訥之旨。何異。但聖人無私心。而老氏一意自私。



其身所以爲不同耳。易之告人。未有不正而得吉亨者。而亦多貞凶貞厲之詞。是凶厲亦正之所不免也。夫過剛則不吉。多言不免於險阻。而守正亦有凶且厲。此所以爲易之道一也。吾輩處世。固不宜必有亨且吉之心。而亦自有免於凶厲之道。每每以此意自檢括。頗能不以世故累心。但恐信道不篤。舊習未除。終不免於補耳。子去無錫。想亦不久。時過必行。亦易之道也。李生黼者。僕未詳其行。然能潛心講究。有稽古之長。與虛誕浮薄之士。作字寫畫者。大不同也。今之所謂富貴貧賤者。何必其人之材德足以當之。直



有幸不幸。豈爲士夫者皆足以致富貴。而此生獨以  
不肖宜貧賤哉。不必深議之也。應常州爲此生刻二  
禮集解。向曾許以作序。未就也。應君見寄一部。已爲  
人取去。子到毘陵。能爲予寄一二部來。尤望僕病尚  
纏綿。不能脫然去體。第爲薄祿羈此。不貲之軀。豈有  
行志及物之效哉。子居彼中。頗與人接。宜詳得僕過  
失。以相告曉。而第以二三好言見慰。何也。子以爲此  
便足以塞朋游之責乎。非予之所望於子也。相見未  
審。何時臨書耿耿。

夏鍾曰。中多名言。聖人無私心。老氏  
一意自私。其身兩語。尤爲不易之論。



與華鴻山

僭敘佳稿。極知不揆。然於往日游世浮跡。盛衰用舍之際。言之有可感者。雖文不爲工。而其意獨至矣。至其所以致推慕感憤於兄者。亦非苟然也。僕常愛歐陽六一所作。釋唯儼秘演梅聖俞詩集內制集數序。感慨曲折。極有司馬子長之致。昌黎無之也。常有意學之。而才力況趣。終不相近。此序亦頗有其風矣。蓋因兄之雅。以稍發吾文。而非吾之文。能有加於兄也。文中徑書尊字。他人觀之。疑其不恭。然此雅道也。不可以俗格亂之。非兄不能知也。僕爲文。其不售於俗。



人耳目。有大於此者。而區區自明其細者。又可笑也。風便賜教。使知可否如何。

夏鍾曰。余愛此書文。不爲工。而意獨至。及因兄之雅。以發吾文。非吾之文。能加于兄。數句。故錄之。

與林希載戶部

側聞榮拜民曹。私心殊不能平。以爲方今士流文學操行。如吾少峯者。不能以一二數。乃不得居侍從。列要近。而獨置之於此耶。又念吾子精敏好學之志。累於簿牒程課之間。不得以專其力。而一其思慮。則欲一日脫去縣邑之繁冗。宜無所計。臺瑣省署之間也。萬金之璧。置之下邑之市。委巷之肆。顧者旣少。售之



亦難移而之通都上國四達之衢四方之名商大賈聚而求寶於是則是璧也。雖欲自爲斂藏不沽知寶者固將不愛重價而購之矣。吾子之去秀水而入民部也則亦難委巷而之四達之衢之時也。何患不售哉。惟吾子益重其寶爲天下寶之同志之願也不肖平日交游漸就衰薄惟吾子不渝而益篤佩之不能去心顧蹤跡之難并徒惘然於臨楮之際而已。

夏鍾  
曰宕

與張淨峯書一

與洪君同行故送公不能遠然雖遠亦終當一別意



到正不在此也。本擬作文贈公行。不特德業地望壓  
題。而茲事體大。亦復壓題。故不果作。謹賦長詩一首  
以見寄。豈謂足以歌咏盛美。嘗觀韓愈於裴晉公征  
蔡。不作贈文。要亦爲題壓縮手。不是偶不作也。然裴  
公功成之日。韓公猶在朝。正典文字。遂得鋪張其盛。  
作爲淮雅。僕旣廢無所用。其文於朝廷。然公功成之  
後。僕尚當爲公賦之。雖制作明雅。自有其人。足以薦  
告郊廟。傳之縉紳。而吾之所賦。或可備風謠樂府。流  
播民間。以諭閭巷口耳也。公以爲何如。

夏鍾曰。堂堂皇皇。題不容輕作。唐人推燕許。  
正謂二公于事體大處出手。便壯麗耳。



書三

於郭博士處得觀所祭陳紫峯丘集齋二公之文。知其決爲公筆。非門生屬吏之筆也。公之學。乾道淳熙間。二三名儒之學也。然二三名儒。亦嘗力爲嘉祐熙豐之文。而終不逮公。學其學。而其文。則嘉祐熙豐之文矣。五管所治蠻口。軍旅之務。雍容優暇。大篇短章。具有體意。公之所養爲何如。至於朋友之誼。生死終始。情文均至。誠有道者之事也。竹坡公銘文。久望未蒙見寄。豈不欲爲之耶。竹坡襟懷灑樂。雖不如紫峯先生。而謹禮循法。踐履篤實。或有過焉。英敏明達。足



以爲政。若不及集齋君。而恬靜無求。於世寡惡。集齋所愧也。今於二公。既有所慕。亦有所取。則如竹坡。恐宜在慕取之間。又重以與尊祖有登科之契。誌塋之文。非公誰託。而公宜亦有意於斯也。故某不敢請於他公。而獨以累公。幸終惠之。紫峯先生傳此等文字。必公爲之。乃有發明賤子冒然爲之。誠非其任。然張生達甫云。公頗訝其引論及公。意若不懌者。竊謂公深於文。而明於知言。決不作此見解。或者書生不曉公所論而失之耶。文之有此體。非賤子刳爲前人之作。多有論死者。而及生者。以交相重而致意焉。公決



不以其體爲非是也。如其意則賤子之智皆足以知其賢。雖言其賢而其分數之嚴亦不敢苟。至於公則所以歸重者特至。蓋非敢以鄙陋之言爲足以相重。實其區區之意存焉。妄意此文於公當有契而不宜以爲訝也。有便不惜示及。

夏鍾曰先生衡量評品之間不肯稍差毫髮其嚴重如此

### 與唐荆川

側見尊公拜南曹郎之報甚喜。使吾子隱不違親。養不廢學。非子之素志也。夫而今乃遂也。恨予不得在金陵而拘繫於此也。令弟計已成婚。田園饘粥之事。



亦不復以累子之力。子其樂哉。不審比來尊體病否。何如何如。子之寡欲省事。以義理養心而病不愈者。未之有也。古稱戰勝者肥。子已無用戰矣。又何所得癯哉。余居此碌碌。殊愧吾子在菴君去。諒能爲一談之由。今追昨其過惡之多。不勝其可慚。赧而悼恨。今惟當常存此心。益加警察。使後之追今。其可慚赧悼恨者。漸加少。庶久之不已。少而漸少。猶萬一可不至於爲小人而已。夫以余之誦習章句。忽聞諸君之論。其於聖賢之學。亦能謬言其梗槩。而竊知一二。然自櫟括其行。則未免於小人。豈非其言爲空言。而知乃



知也。然則由是以知大學之所謂致知者，信在內而不在外，係於性而不係於物。而龍谿君之言爲益可信矣。余力本弱，資本下，而子往往謬以爲可進，是非好而不知其惡。母亦誘而振之也乎？益友離居，弱力下質，愈其所誘進而奮發。吾子山中所得，宜一一見示，無爲獨善。在菴君誠良友，去此大可悵恨。占筆信率，不盡此心。

夏鍾曰：深于先儒語錄之旨，至云未免于小人先輩學問之嚴，一至此乎？

### 與汪直齋

學記久稽復命，至煩特使遠至，罪負何可言。其所以



遲遲而負稽逋之罪者。亦欲竭其鄙陋之意。冀有一言之可觀者。以不重孤執事之托。與吾克齋之意。今其文成。而鄙陋不足觀如此。抵重自愧耳。自有序記文字。以采諸名家之文。爲記學而作者。唐人皆有愧詞。雖韓昌黎夫子廟一篇。亦爲劣。蓋唐制立學不廣。不但諸家無名文。而諸家之文爲學而作者。亦少。惟宋慶曆詔天下立學。制始盛於郡縣。而古文之興。亦自慶曆以後。故宋人之記學者。其文甚多。然惟李旰江袁州歐陽六一吉州二記。盛爲一代所傳。二文要爲差疆人意。在二公亦非其至者。至曾南豐宜黃筠



州二記王荆公處州慈溪二記文詞義理並勝當爲  
千古絕筆而王公視曾猶爲差貶焉學問文章如宋  
諸名公皆已原本六經軼絕兩漢而記學之文其難  
爲工如此况鄙陋無能如不肖者而敢妄希有一言  
之可觀以副執事之請耶惟望改削使不甚紕繆然  
幸幸

夏鍾曰先生留心記學之文故其考核如此近代學記濫觴已極須以此文正之

### 與李嵩渚

汴上官游無他所得惟幸與公相見因屢款芳論楊  
權於風騷之場此爲有得耳嶺外中州相去甚遠無



由與公相聞。惓惓之。意想彼此不異也。居閒或追數  
踐歷事跡。輒有感歎。蓬池之上。阮公長嘯。杜甫與高  
李登吹臺。悲歌酣詡。皆傳爲後人美談。久而不泯。吾  
雖遊汴。豈復能使其跡有記於後耶。然諸君子當時  
皆旅游寄寓。其跡爲奇。吾方擁旄乘傳。從事於文法  
體執之間。固不能爲奇。如高適持節彭門。今人亦不  
復道說。而灤西夔門。杜甫融顯之。與漂泊其得失。固  
如此。夫吾今已廢。宜可以爲奇。方圖出游。自計已悔  
少日所作。而仰希聖門。狂簡之學。果其遠出。又不能  
爲奇。且將被逐。見譏。糧不繼。而樹遭伐矣。以此疑而



未決敬舉以似公。夫往者既失之，而人又度未可得。以釋其疑而決其計也。數年不通書，又不作寒溫之語，而獨質以吾所疑者，蓋望公之至，請勿忘見答也。願言之懷，殊不一一。遊記二篇，聊復請教。

夏鍾曰：固不能爲奇，宜可以爲奇，又不能爲奇。先生之好奇，一唱三歎，至是耶。

### 與林二山書二

世上許多漏缺敝壞，急須補塞整頓。有人足以爲之，而顧使之久袖手以傍睨，不知天意世道畢竟如何。其終於此而已。則吾不敢知。如其不終於此，則何不使其人早得爲之。乃欲待其時已過而力愈費，何也。



不肖所以汲汲於公之未起。蓋不能忘情於此。豈以  
中丞爲未尊。自中丞以上。尚有高官之可榮。而足爲  
公重哉。天下事。但使當局而爲之者。與側坐而觀之  
者同心。則無不愜人意。不肖之談。蓋側坐而觀之者  
空談耳。聊爲公發之。知不以爲狂謬也。

與李中溪書一

庚子歲在汴臺。獲通荆川之問。方繼續相聞。辛丑  
之變。雲翻雨散。今思之如夢。追談之亦何異說夢也。  
棄置不復云。如第之陋廢。而閒居談道著書。尚有用  
力處。而不以區區名勢得失者。動其意。况如兄之高



明奇偉者乎。所恨者各生遼絕遐阻之鄉。嶺限海帶。如各一天。不獨兄養性綴文之益。僕無由請而優之。策駑磨鈍。黽勉一得之愚。亦無由爲兄盡之也。如何。如何。明倫堂記。曾錄寄武進唐應德兄。并與書云。此文乃明道之文。非徒詞章而已。其義則有宋大儒所未及發。其文則曾南豐筠州宜黃二學記文也。唐君復書盛有所契。不以予言爲妄也。然世之名能爲文詞者。舉不足以知此。亦可以歎近世文弊。而有志之士。不得有明也。周戶部誌銘。李尚寶行狀。不獨其文而已。其是非不敢苟者。乃吾所以爲文之道也。兄如



信其道則可以因此文而知二人之爲人矣。家居治  
心講學之餘不免爲人牽挽作酬應文字亦不敢苟  
而必有法以無刻本不得相寄然未嘗不坐此取謗  
方用世時好行驚衆之事以召怨嫉今不用而退于  
家復爲驚衆之言以取譏議是無所往而不得謗也  
然吾亦何暇恤哉非敢不恤也道本如是而不可變  
恤則非吾所學之道矣兄以爲何如久思欲與兄相  
聞絕無便者茲舍親往佐嵩明州嵩明不知去大理  
若千里然托黃君以必達也有便幸無忘報我

夏鍾曰是非不敢苟乃所以爲文之道道本如是而不可變吾所以推先生之文當與宋文憲並也



與吳泉濱

僕爲此文。以授佩甫君。使刻石納壙中。佩甫讀之。未  
畢。涕數行下。哽咽不能出聲。幾於自絕。爲廢其讀。讀  
之三四。而後能畢。每讀皆飲泣欲絕。以謂道其情事。  
如探其肺腸。腎膽。而所以寫其親者。不獨神志如存。  
形貌亦宛然在目矣。夫孝子不忘其親者。思其居處。  
思其笑語。思其所樂所嗜。思之之極。其精誠之專。而  
猶不得見。而一讀吾文。則其人忽然在前。而居處笑  
語樂嗜。皆是。蓋文之妙如此。昔少君致李夫人於帷  
帳燈燭之間。使武帝真以李夫人爲生也。文亦有是



與然非佩甫君之孝亦安能於吾文中輒見其親之悲之至於如此極也公既深愛佩甫而尤好吾文故聊往覽而併道佩甫之所感於斯文者使知吾文未足好而佩甫之孝爲可重也

夏鍾曰旣自賞吾文之妙又歸美于佩甫之孝無一句不近情妙妙

與張秀才

二生來傳示尊意託於他事不欲屬筆如此則孰能代此筆者。是執事之意不欲爲此而託以辭耳。竊謂此等事雖是好事。然實無所利於其父母舅姑之家。故出力以爲之發明者少。而此烈婦之父母舅姑皆



常人守陋安舊非能出力求爲此婦發明者吾輩正不當以其不求而怠也蓋發明節義以裨風教乃吾輩有識者所能而不宜責之守陋安舊之常人在執事不當以其不知託重而忽其婦也若以爲其婦事未可發明則此婦自喪夫以來立志堅定必踐其言卓然昭明如揭日月不可誣亦不可掩執事亦必問之審訪之真更無可疑矣若以郡博士駁語爲疑則此乃文移當然且其覈之嚴乃所以使其事跡之著也無疑駁之復乃所以使其文牘之行也有據不獨事體當然而且尤爲有意於發明也執事亦何用疑



焉。如不以爲然。請面質之。博士必以僕爲先得其心也。幸毋忽。

夏鍾曰。發明節義。以裨風教。不當以不求而忽之。覈之嚴。所以使其事跡之著。可謂留心風化之極。

寄道原弟書一

得李抑齋傳來大選報。知是武選。此司中事體。頗關係。條例甚多。往時諸曹郎。只以談文賦詩爲高致。其下者。以圍棋飲酒爲樂。鮮有留心國事。以致吏人作弊。賄賂公行。大抵京官。固貴以文學潤身。至於職事所掌。尤宜加意。今日登仕之初。便宜立定主意。以明習國家事體。爲要我舊日爲曹官。亦只是以作文賦。



詩爲第一義。故於本朝事體諸司職事不甚通曉。後來雖稍聞知。亦只是獵涉泛濫。不爲精切也。當時若知此意。就使練習典故。亦自不妨作文賦詩之功。只緣無人提破此端。說話因循過日。及爲吏部驗封。自掌司事。始知典故不可不習。稍稍留意。而卽以權臣之怒謫出矣。真可悔也。兵部經火之後。人籍無存。只有李遜廬尚書在部日彙集兵部條例一部。甚詳。我同日已抄得數本。但未完。而有常州之行。今此數本亦不復存。可抄得一本寄我。又京中有好書無印本。及有印本而我所無者。時時收得寄來。此至切務也。



李蒲汀家好書甚多。其子若相識。可時與之借錄。不必求好。只以有此書爲貴。又要抄字不訛。須着吏查考。叅對大抵蒲汀家書好者。第一是板好。此不足喜。但是宋儒經義及查考制度樂律水利兵刑等項名數之書爲上。文集次之。至於雜家小說又次之。此一事須着意。如飲食然。乃可得。若悠悠泛泛。決不可得也。

夏鍾曰。明習國家事體。爲要中肯之言。求書須着意。如飲食然。乃可得深于求書之言。

### 書六

日下旣爲郎。事事要有根據。而要事不妄。須精神聚。



應接周旋。照顧多極。分精神便於臨正經事。體無力。故今日尤當斷交游。而此時只以作郎中一節。就變局面。未爲不可以爲郎。便有事。有事便有形跡。便當關防。乘此多閉門。少騎馬出街。則所省亦七八矣。爲郎官與做外官不同。外官要通敏活變。隨時隨事。斟酌人情。答應發遣。而爲郎。只要記得職掌事例。熟守得條格。定便是好郎官。而題稿與行稿。貴有好文字。今須日日取舊稿。及他時諸公奏牘疏議等集閱之。亦有可相資益。且或可採用者。就是近時夏桂洲奏議。此已是欠學力根據之文。然猶爲綜練詳贍。亦可。



觀也。若林雙臺陞早。汝調早。則儀部無日不是稿。又須於典章名物。禮樂器數。有些查考。一部文獻通考。通志畧。杜預通典。常要在目矣。留心留心。

夏鍾曰爲郎官者  
宜書一通于座右

### 書七

來書所問詩作豈容易談。第一要有學問。次亦要才力不弱。每見世所稱才子所作。不但去古人遠。雖何李二公尚隔多少層數。然今人易足。又眼不明。或已有輕視兩公之心。而自謂所作者乃初唐也。不知初唐本未是詩之佳者。故唐人極推陳子最以其能變。



初爲盛而李杜繼出此道遂振同時高岑王孟乃其  
大家今只取此六家詩讀之便知其妙而見今人之  
所爲者皆陋淺無足觀矣故爲詩於今之時者使真  
做出初唐詩已爲擇術不高况又不如初唐今且勿  
說到骨髓處只說箇大槩初唐之詩千篇一律數家  
之集皆若一人而一人之作亦若一首其聲調雖俊  
美體格雖涵厚而變化終不足盛唐之詩則人人有  
眼目篇篇有風骨卽此以觀亦畧見不同大致矣吾  
向贈宋仲石詩如起句洛陽橋外路萬里指長安今  
贈唐婁江如帝心嘉勞來戶口不虛增結句如相送



情無已。寧因感遺肝。莫倚鸞鳳志。今當作鷺鷹。皆不  
容易得。然知之者少矣。舊歲與方洲遊山。詩句句俱  
是風。不涉陳套。不守言筌。然方洲亦未甚解其妙也。  
信是知之者難。如取路非高足。入山力復餘。畏景在  
城市。聊茲息茂陰。此等起語。如堪嗟二畝半。促促邑  
中居。明歸應復望。惆悵使顏衰。此等結句。總是唐人  
中翻來。然何嘗涉他成套也。意之論是如此。然造字  
造語。亦須知其不同。如我所舉此數語。都是史漢文  
氣。一字一字都健。若一時諸作。惟荆川時時能出此  
妙意。然句語遣得。亦有未到雅健古老處。今只看高



岑王孟杜甫之詩便能知之。李太白猶不免輕浮而失倫次也。但天才勝人超絕千古。不得而肆譏彈耳。吾詩自覺於古人合處不如文。文則有全篇合。或有過之者。詩則不能如此。然今人窺我門戶則猶未耳。只自默默存記此言。日讀古人。又叅看時人所作。久之自透露見識出來。則雖做不得古人之詩。亦論得古人之詩矣。但論得就是學力更勝於作得也。論得者。或不做得。不妨爲名家做得。而見不得。終是偶合。且亦無不明而能作之事也。故凡事先須從識上起。因汝來問。偶及之。恐汝亦未得開曉也。



夏鍾曰是唐人詩定  
評亦是先生詩定評

書八

留子行來領書無甚欲言者矣。文一篇正今日作者  
遂以封去。有欲見者可出與觀。如非欲見吾文者不  
必自出。蓋文之學不明於今甚矣。驟見使之迷惑驚  
恠。無益也。方洲嘗述交游中語云。總是學人。與其學  
歐。曾不若學馬遷。班固不知學馬遷。莫如歐。學班莫  
如曾。今我此文正是學馬。班豈謂學歐。曾哉。但其所  
學非今人所謂學。今人何嘗學馬。班。只是每篇中抄  
得三五句。上。全文其餘文句。皆舉子對策與寫東



寒溫之套。如是而謂之學馬班。亦可笑也。此話無處說起。惟汝不可不曉。他人不必爲之強聒。徒取其譏訕耳。屬有客草草。

夏鍾曰假古文壞文體當以此語正之



當以批語五之  
夏動曰雖古文辭文

信耳語亦容草草

猶以批語不問不觀此人不必為之說語其

寒出之寒咬長而隔之學黑斑衣何笑也批語無



王遵巖集卷之七

晉江王慎中道思著 後學張汝瑚夏鍾選

記

龍溪縣修學記

龍溪縣有學舊矣。士日遊於其中。忽覩其瓦墁。碱甃。題榮。棄桷之堅。好華絢。化去腐缺。黜黜之陋。如寔始作。一旦躍然以喜。益起其游歌講習之志者。揭陽林君松爲縣之時。嘉靖二十六年也。君以寬簡爲治。其本以不擾。其出之於政。不爲緩弛而無制。故其意能諭於民。而亦不敢慢其令。役之於可勞。不待疾聲變。



色而趨之者敏士有其樂而厲已之毀不作於民。於是士民相與謀而來乞記。將以載林君之美於無窮。余旣不得辭。則爲誦所聞以告焉。蓋余聞之有生人之道。而無司徒之教。則衣暖食足。而乃所以陷之於爲禽獸。故立之典常。而設之以君臣父子夫婦兄弟朋友之名。名者實之所居。而義之所從出也。故爲之親義序別信之教。使得其所以爲君臣父子夫婦兄弟朋友者。而器物度數容節之用於有事。其變無窮。而皆其所不可廢。則爲之制其器具其物。差其度數。飾其容節。使有以應無窮。而待夫人之有事。其詳至。



於難勝而約其目。於藝有六而已。民生於其時。自心  
之所知。以及耳目之所覩聞。無越此者。童幼而習之。  
至於長身沒齒。而不得變焉。其居處之所常。則或於  
肆於市。於畎畝之中。其業之所治。則或執規矩以利  
器。用通貨賄。以遷有無力。稼穡以生穀粟。能否不以  
相易。各守其長。而安其所處。彼已無以相美愧。仡仡  
焉。竭其壯老之力。以由於司徒之教。而不知其所以  
爲之。此舜之所以命契也。然此所以爲教。其倫在乎  
君臣父子夫婦兄弟朋友。其藝在於禮樂射御書數。  
而其所以然。蓋有可知者。而非民之所及也。於是



胄子之教焉。而以命夔。此所謂士而貴於民。其居處必在於間燕。其業必在乎期命辨說。絃歌蹈舞。而其尚在於能知其所已然也。由之者雖不通於性命而不足貴。而踐習服行之篤。常可以寡過。知之者之可貴矣。少有蔽偏之弊。雜於其間。必至於拂經賊德。過焉而不止。而徒以繆驚夫由之者之民。故詖遁反側惑世誣民之害。常出於士而殄行驚師之戒。尤爲當時之所謹。患其蔽陷離迯之情之不可以驟察而遽得。而明其是非之端於後。其端旣明。撻焉以示其儆。書焉以俟其悔。至其儆之而不威。俟之而不變。則



從之以戮辱徙逆之刑○蓋古者於士○其待之之重而○  
教之之難○又如此○夫已別於執規矩○通有無力稼穡○  
者之所業○而居處常在於閒燕矣○豈有暴凶昏黷以○  
厯聖人之誠○而煩王者之刑○而其聰明才智之過出○  
於蔽偏之弊○則得罪於聖人而不免於誅○如彼其嚴○  
蓋道德之所在○必出於同○而學之不可以苟也○由唐○  
虞以至於周○其間雖更弛壞○而其道未嘗不同○及周○  
之隆○而其教益明矣○其見於周官司徒之所肄者曰○  
德曰行○曰藝○皆有六焉○行與藝者之六○蓋民之所同○  
由而德之列於一○則士者之所獨能也○嗟乎○由其所○



當爲而有所不能○則謂之民而不足貴○而名之曰凡○  
有能其所能矣○少出於蔽偏○則足以獲罪而無所辭○  
誅○卒不得謂之民而名之曰頑○惟盡其同由而超然○  
得其所獨能者而後可謂之士○今之游於學博其衣○  
裾冠裳綦裴○于于然挾冊而讀誦○鼓瑟琴而吟詠○蓋○  
古之所謂士也○旣已侈然自貴於利器用遷貨賄生○  
穀粟者之民而無所愧矣○其尚因余之所聞思焉○而○  
有寤求其所以爲士者○無辱古之所名而有以興乎○  
今之民也○由是以載林君之美於後○豈有窮哉○

夏鍾曰士爲民首○苟不知學○至不得與民等○而○  
不免於誅○然則士可不學○將學亦不可設矣○



明倫堂記

堯舜在上。設五品之教。振民於飽煖之餘。而免於禽獸之患。三代循是以建學。爲之立其官師。作其宮室。辨其時物。勅其條法。甚修而綦隆。而孟軻氏獨知其指。曰。所以明人倫也。民之不可使知。雖堯舜猶病之。而其聰明彊敏。有材智者。傑然特出於衆人。其材之成。足以踐三才之道。其過也。至於殄行而驚世。智之至。足以察萬物之理。其蔽也。則必爲邪說以誣民。先王取而命之曰士。而教之於學。其所爲教。有可得言者矣。縞收端。得鞞紳綦偁之飾。而裼襲委垂之宜。琮



璜。琚。瑀。齊。夏。和。鸞。之。節。而。步。趨。周。折。之。度。豆。籩。簠。簋。  
鐘。鼓。管。絃。爲。之。器。而。酬。酢。搏。拊。以。爲。容。典。謨。雅。頌。射。  
御。書。數。爲。之。文。而。詠。歌。講。誦。以。爲。業。耳。目。足。以。極。視。  
備。聽。口。與。手。足。足。以。放。言。恣。動。然。所。以。禁。防。而。開。發。  
之。者。其。爲。事。詳。而。爲。物。博。如。此。至。其。所。以。爲。是。詳。且。  
博。者。其。跡。可。守。而。其。妙。不。可。爲。其。形。可。名。而。其。精。不。  
可。言。其。通。於。天。謂。之。命。出。乎。命。謂。之。性。凝。神。於。不。見。  
不。聞。之。表。默。化。於。無。聲。無。臭。之。中。形。器。俱。泯。而。思。爲。  
無。所。日。改。月。新。而。不。自。知。其。所。以。然。其。於。所。謂。父。子。  
君。臣。長。幼。夫。婦。朋。友。者。顧。若。疎。濶。而。不。治。簡。畧。而。無。



當蓋孔子教於洙泗之濱。述聖道以善其人。待來者。所可聞者文章。所雅言者詩書執禮。所不可語人而以待中人以上者。彬彬見於魯論所載。顏曾冉閔之所答問。曾不少及乎君臣父子長幼夫婦朋友之間。而以孝爲問者。游夏二人而已。先王所以造士。孔子所以誨人。其可言者如此。烏在其爲明倫耶。是不可以不知也。習其教而不知其所以教。由是會其高者。以爲發揮於性命。而不悟其爲人倫之本。先王之道。使其高也。而出於人倫。是乃所以爲異端。而非所以爲性命也。守其卑者。以爲該貫乎事物。而不察其爲



人倫之用先王之道使其卑也而外於人倫是乃所以爲曲藝而非所以爲事物也德之不一俗之不同豈獨學者失其體用哉以子貢之賢當其未悟猶思托於事君事親以求息焉而少休乎爲道爲學之倦彼不知其所學者所以學爲君臣父子夫婦長幼也大學之道極於齊家治國平天下而家國天下固非蠻貊之邦鳥獸之羣也必有人焉居其間非謂之君臣則謂之父子非謂之夫婦則謂之長幼朋友也人有心之志意之精主乎內有耳目手足之動行乎外非之於君臣則之於父子非之於夫婦則之於長幼



朋友者也。先王之教使之凝神。默化致其心知。志意以善其內。又爲之設其文采。備其容器。制其度數。使有以禁防。開發。謹其耳目手足。以善其外。其通於性命者。行乎事物。其由於事物者。合乎性命。其學於事物性命者。貫乎人倫。故其於家則父子親長幼序。夫婦別其於國與天下則君臣義朋友信。故無一命之爵。無尺土之階。而人物之性以盡。齊家治國平天下之事畢得。誠行邪說無由而作。民生其時無復震驚誣惑之憂。其於君臣父子長幼夫婦朋友雖有所不知而坦然由之。是民之所以親也。親而不能明。民之



所以爲下也。明之而使民親焉。士之所以爲上也。泉  
之有學。國家所建。教學之法。則命於天子。其來非一  
日矣。士之聰明彊敏。能自致材智。以見於世者。往往  
由之以出。而未有能得其所以教者。郡侯俞公爲政。  
好以德教撫循其民。養其長老。而訓其子弟。惓惓於  
德之不一。俗之不同。以爲是有責乎爲士者。又不鄙  
之爲不足與進。且知其民之已信而可用也。乃與僚  
屬咨議。叶謀撤明倫堂之舊而新之。以與士者講習  
於此堂。而委記於余。余謂古者立教。其具誠設。然所  
使長治之者。皆賢卿大夫。以其素講之學。成德之行。



倡導而鼓舞之。其於化民成材尤易。以侯之賢。專有  
長治之任。而斯堂之作。及其政成。民信之日。士之興  
起。發憤於斯時者。宜益衆。咸思捨舊棄故。以聽侯之  
所爲。雖今之去古遠矣。所以禁防開發之者。其具難  
以一二追古。而心知志意之精。未有求於內而不得  
也。得於內。未有不得於外也。學之則爲士。不學則爲  
民。上下之分。可不勉歟。興造之歲月。則始於壬寅七  
月。已巳。訖於十二月庚寅。金取於帑之美者。其役鉅  
體大。而費不及民。工不踰時。亦可書也。侯名咨伯。平  
湖人。由工部郎中出爲今官云。



夏鍾曰先生自評此乃明道之文非徒詞章其義則宋儒未發其文則子固筠州宜黃二學記信然

### 夏津縣修學記

夏津於山東爲小邑。賦入單儉。疆理褊迫。詩書禮樂之教缺。然不興士。無以成其聰明碩大之材。然俗固專慤不雜。重生而慎刑。吾師易愧虛先生之令。於是邑也。力行節儉。躬率以德。爲之期年。民旣觸其專慤之良相。與馴習而悅安。乃始謀所以昌明詩書禮樂之教。顧惟國家造士之典。邑立之學。教之所出。莫先乎是。而學宮傾毀。廟宇敝漈。不足以居游息。起瞻慕。慨然有意於作新之事。邑固儉迫。難以驟役。而太勅



經度盈縮議不煩於衆。慮不動於民。捐廩斥羨鳩工。庀材舉之以次第。遲之以歲月。明倫之堂。先師之廟。煥然改飭。翼廟之廡。側堂之齋。環之爲垣。樹之爲門。與夫庖廩庫廐。莫不畢治。祭祀宴射之器。稍以完善。作啓聖祠。以應新令。拓立學舍若干間。以待士之來止。而修業者。蓋始於戊戌。訖於己亥。凡再閱歲。先生於夏津之士民。教之欲以成其材。愛之不欲傷其力。故其籌之如此之勤。而就之如此之徐也。初余視山東學政。先生告余以其本意。比余再徙官來河南。而先生始以書來述其所以。而屬余爲記之。余考在昔。



人材之盛。俗化之隆。莫如成周之世。周之所以教人。之法。何其詳也。自鄉射飲酒養老合樂。以至勞農飢獄。飲至獻馘之事。無不在於學。其術則順四時而使。之絃歌。蹈舞。讀誦。辯說。習其筋骨於節度之中。一其耳目於聲容之間。開之盡其物。而充之有以達其材。防之多其途。而養之有以全其性。士之行修德成。而可以爲世用。非獨其質。亦先王之所以教之有其具也。今之立學。其亦有先王之法也哉。惟讀誦之存耳。而使之作爲文詞。以徇程式。而求合有司之尺寸。則其所存者亦非矣。宜乎古之君子。有感於古今成材。



之難易也。蓋余聞之先王之道。其立之也微。其行之也著。微者立於不可知之表。嘗託於著者以行而著者。所以行其所以立。故雖煩且密。而皆有以達人之材。盡人之性。惟其微。故無得而加損。而著者可以化裁而變革。隆污常因乎時之所宜。寬猛常適乎人之所安。先王之爲此。凡以禁過禦淫。去昏撤蔽。使人自得其心。是以由其法者。誦說諷詠。則煥然博其理。義之趣。擊憂拊奏。升降俯仰。莫不油然而長。其莊敬歡愛之情。蓋其不慮之知。無體之中。無聲之和。有以自得而然也。及教之衰。漸以放失。學者昧其所立。而惟著



之習論說之詳。聲容之盛。益足以適性而叛道。其守之愈嚴。治之愈精。乃所以爲陷深而去遠。老聃莊周之徒。乃始以聖智禮樂爲疵。藝淫技澶。漫摘僻以擢亂聰明。滑性命。撓人心之具。如畢豎。簪笄之足以亂鳥獸。魚鱉於山澤然者。其懲之雖過。而學者之失性離道。宜無所逃於彼之誚也。方舜在深山之中。鹿豕之與遊。木石之與居。豈有鐘鼓管籥。玉帛俎豆之器。簡冊篇詠之文哉。然舜用其與野人同者。以爲聖而莊周之所笑。皆游夏之徒。學於夫子而一再傳者也。大羣於鹿豕而不異野人者。不失其爲舜而誦法孔。



子○被○服○周○公○之○文○者○乃○不○免○爲○莊○氏○之○所○笑○學○者○亦○  
可○以○反○其○本○矣○蓋○孔○子○戒○小○子○以○學○詩○可○以○興○觀○而○  
羣○以○怨○其○實○以○之○事○父○事○君○彼○其○諷○詠○而○誦○說○者○皆○  
吾○之○性○情○也○禮○樂○之○實○孟○子○嘗○言○之○矣○曰○以○節○文○而○  
樂○大○孝○弟○而○已○是○所○謂○本○而○不○可○得○損○益○者○也○嗟○乎○  
今○之○學○者○以○爲○上○之○所○以○教○我○者○非○有○先○王○之○法○也○  
退○而○同○於○鄉○人○固○已○卑○矣○其○有○志○者○必○欲○反○古○之○道○  
謂○不○如○是○不○足○以○爲○先○王○之○法○法○爲○可○復○而○身○終○於○  
無○成○亦○可○謂○蔽○而○不○達○矣○故○余○於○其○請○文○而○爲○之○說○  
使○夏○津○之○士○姑○後○其○所○習○先○立○其○本○以○自○得○其○心○本○



王道集卷之七  
之既立則其著者固可以化裁而變革且先王之法  
自是或○因○以○可○復○焉○無○爲○自○貶○以○同○於○鄉○人○空○言○而  
妄○意○乎○古○也○

夏鍾曰有大本領方有此  
大議論真可勒之學宮

松溪縣改建儒學記

嘉靖二十四年某月松溪縣學災其時青陽柯公喬  
遷之方以布政司叅議分守建寧行部至郡縣以災  
告馳往視之度閒燕之地以居士使無失業士忘其  
災乃謀作治之事視其基痺陋而偏於城闔蓋始徙  
不審士游於陋數十年而不得復因舍今所燬而舊



是圖闢侵覈冒。故基以得稍市四旁。衍地以廣之。而作治之基審。始爲會財所出。徵發調集。具有條理。有司蒙成而已。蓋公好學問道。論爲世師。其見於政事。宜與俗吏不同如此。旣會其本末。以授知府錢侯。侯之在郡。廉簡溫仁。其信於民也久。又有所授以從事。民亦不戒而來。作治未幾。而學成矣。柯公以書至清源山中。屬某爲記。余辭不能久之。而分巡建寧僉事翁公學淵。以幣來速文。余益不敢當。其後柯公由叅議爲副使。巡海行部漳州。余得質以所聞。然後敢以其所質者爲記。蓋嘉靖二十八年七月也。錢侯旣



遷謝侯上箴來代能修錢侯之美。叅議仁和吳公源。僉事江寧張公恕。並以直清寬大布宣化理。尤加意於學校。而以璽書督學於閩者。應城周公琬也。周公才學名一時。條教科指。有以作人。松溪之士益勉所聞。以稱諸大夫嘉育之盛。而某之記適成。記曰。先王設爲學校。聚天下之士。教於其中。將以使之自覺。內得於心。以成其性。而有以爲天下國家。而其教必謹於形器。悉於名數。自其耳目手足之所感。以爲視聽言動之用。皆必有不可亂之節。與不可易之物。非其物。則有禁。而不得其節。不苟然以徇也。守之之嚴。防



之之密如郊關市門之譏非常殆又甚焉一歲之中  
冬夏以習禮樂春秋以治詩書無有須臾之頃閒焉  
以嬉耳目手足之用將舍是而爲他而有所不暇所  
爲能得於心高微深眇耳目不可得而遇手足不可  
得而致者未嘗及焉彼存其耳目而其所不可遇者  
固已察矣約其手足而其所不可致者固已著矣其  
察其著出於服習而勤修故能深思而獨得之其得  
之也難則其修之也益固可以持久而不勒如是而  
處詖邪怪譎之時接乎姦亂之聲色淫慝之禮樂固  
可以不變况於其防守之嚴且密哉其教足以成人



之材已成之才。又足以爲教。姦亂淫慝之術。不得出於其間。一有出焉。則其材之旣成。有以燭知其害。攻距之不去不已。而所設之教。又得與夫所成之材。交存而不喪。旁皇周浹。至於廣遠。則荒陋遐阻。四達而無所不被。漸馴庚續。至於悠久。則歷世改物。而流風遺俗。可以詠思興起。於不泯。蓋三代之治之極。而學之成如此。由周之衰。先王教人之法。相屬而靜壞。人之耳目手足之用。自爲其物。而貿然莫之爲節。苟簡殘缺之餘。猥以自恕於卑陋。而便其縱弛易肆之私。而才辯彊力之出於衆者。始有不安之心。以其物之



無所遵。其節之無所做。徒以妄意於高深微眇。以爲  
可得而遇。且致也。奇囀詼詭。日作於形器。紛然以驚  
督當世之民。如是者。皆見爲才。而足以易於天下。振  
矜其所不可得遇者。而形之於耳目。未嘗有察也。道  
說其所不可得致者。而措之於手足。未嘗有著也。其  
卒歸於卑陋。而適所以爲縱弛自便而已。蓋孔子興  
於洙泗。與三千之徒共學。其教必以文行忠信。其雅  
言必以詩書執禮。其自爲學。則繙十二經。而不以爲  
多。三絕韋編。而不以爲勤。聞樂於他國。問禮問官於  
人。射御之卑。執焉而不辭。獨立而訓其子。其學必在



於詩禮語上而爲顏子言。其目必在於非禮之勿。以視聽言動。而其所自言。則曰下學而上達。此先王立學之方。而教人之意也。由今之道而爲學。誠不能一二以合先王之法。旣皆曉然知尊孔氏。而誦其所傳。則於形器名數。固不能無。今昔先後之差。而視聽言動之用於所感。出之必有其物。動之必有其節。閱千百載而若旦暮。其曰下學云者。攷於其書而可知也。是將不越夫耳目手足之間。而有以得其不可遇。不可致者。惟在夫慎守而篤行之而已。可不勉哉。

夏鍾曰先生嘗云學記之文必義理與文辭並勝先生諸記無媿斯言



長汀縣學記

學之立否。果有繫於人才之成壞乎哉。五臣十人而  
下。人才之美。莫春秋時爲多。然鄭在王畿之內。學校  
廢弛。詩人傷焉。子矜之篇。顯著於風。子產爲政。與人  
頌之。以爲能教其子弟者。而毀學校之說。獨出於其  
時。雖其不毀。姑以使好議者往游焉。而非有興起教  
養之誼也。魯最爲禮義之國。泮宮之作。猶待於僖公。  
其濶絕而寥簡甚矣。齊晉秦楚之間。又可知也。周之  
天子。未嘗以貢士中否。用慶讓之典於諸侯。王臣行  
過侯國。以臺池苑囿之崇。陂梁道路之弗占。國之不



治不聞以學校不立爲譏。而原氏之卿士至以不悅學語於朝。其上下之間。怠於學校之事如此。士之生於其世。顧多碩大光明之才。大足以用其國。其次亦足以從政。其臨利害。死生之際。而節足以有明。處進退。去就之幾。而智足以自決者。尤不爲少也。西漢立太學。設博士。詔郡國舉孝廉。而增廣學官弟子。諸儒明經者。得以列學官。而雅樂亦盡出。獻之三雍。有大政事。賢良文學。與公卿大夫雜議。彬彬之盛。庶幾乎金口而木舌矣。由建武以及本初之元。尤留意於斯。拓立學舍。益置弟子員。視西漢有加焉。然兩漢之士。



皆尚通而易渝。好異而多蔽。故倖得苟免之行。成而不槩於名法。詭訐矯拂之習。勝而不致於實用。而其微辭顯義。誦傳而闡發者。亦未有及春秋之世。能言者之一二也。學之立否。信於人才之成壞。未有繫也。歟。嗚呼。果其人才之成壞。無所與於學之立否。則吾將以先王之制爲繆。且愚而先王者。古之聖人也。先王將以道德一天下之民。而其秀而可使知者。爲可。以用其教。此士之所以貴。而學之所以立也。道德之在於教者。其講肄有業。其辯說有數。其蹈舞有節。其視聽有物。其導之勤。則春夏秋冬有其術。而旦晝向。



晦皆必有所爲其視之詳則一年二年有其等至於九年之久猶懼其將反也其勤且詳如此非直以善其口耳之所涉安其手足之所措而已使其精於思而不惑繆於氣而不亂故其知之明則通乎天地萬物之奧而無所不盡其才之充則適乎天下國家之用而無所不得其教之成至於化俗學之行至於動衆則賡緝周浹範圍鼓舞民莫知其所以然而皆一於道德及其旣衰遺俗緒訓猶足以覺寤乎有聞者之聰明感奮乎好善者之踐修益其學廢而教猶有存也春秋之世所以成材之多其不以此與而彼兩



漢之士不得預被先王之教徒以建學立師之廣而  
亦有以美其才其所就誠愧於春秋而後世莫過焉  
使春秋與兩漢之士生於先王之隆其學大備而教  
素明則彼所謂碩大光明者當與十人同科而亦豈  
有尚通而不槩於法好異而不致於用之過乎春秋  
之士由學之隆雖其衰且廢猶得以有聞而好修兩  
漢之士雖所以教者非古特以有學而其才可名於  
後世學之果不可以已也去古已遠而爲吏者知急  
興學之爲務信乎有志於人才而亦可謂知所以求  
成之者矣汀州知府汪君侏長汀知縣祝君一鑑是



已長汀故有學而痺迫弗稱孔子廟亦就圯諸生來  
學每病其不足以時居游而聳瞻嚮羣聚而謀之久  
矣吏忽不省汪君以鉅才爲編郡力益有餘而吾同  
年友李君遂方以福建左叅政行部汀州郡以謀告  
而意克叶因視其學地曰是其方位據向不爲良也  
蓋革而圖諸乃攻位於其位之右畚壤測臬而望之  
經體面勢言言噲噲不大變徙而得位之良如遷卜  
焉乃作文廟乃作明倫堂而祠齋廨舍庖庫廩廡咸  
以序爲蓋其據向良而規制壯矣祝君後至尤知原  
本大吏之意而奉其所營於是斲刻丹雘之飾煥然



完富而新學之美。甲於郡中。士皆歡喜道說。相携而  
至。以得學其中爲樂。汪君不居其功。而歸善於李君。  
以爲非其叶意。而決謀則無以卒是役也。而又因李  
君以來請記。夫去古益遠。之後有能因當時之法。揆  
先王之意。興學以造士。如諸君之所爲者。長汀之士。  
其所遭旣已有過於春秋。而不後兩漢矣。諸士宜其  
來學而樂也。然去古益遠。先王之教益微。將何所景  
仰而興於學耶。先王之所教者。道德而已。其具在於  
講肄辯說之業。蹈舞視聽之物。而其本在乎精於思  
而純於氣。此豈以遠而不傳者哉。兩漢之士。不能盡



心乎此而使世之論者將疑乎學之無繫於成才之數。此士之罪也。故余爲記以告之。嗟乎長汀之士其尚盡心焉。務使論者無以咎士而將有以明有司之功也。其亦汪君求請之意也歟。

夏鍾曰學自有虞氏已設人才特盛千古春秋時既衰由學之隆而人才輩出兩漢之士不得躬被先王之教徒以有學而亦有以美其才雖不逮春秋而後世莫過焉抑揚反覆總見學不可廢之意

府學修造記

孔子之道其大莫能爲之外而爲其內者之物蓋亦詳矣。宮室服器所以爲吉凶之用等殺品節不可僭踰而非寔廢缺又謂之不備。筵常仲縮章就少多觚



園○弁○哆○之○薄○厚○濁○清○猶○必○有○法○而○形○象○名○貌○於○以○體○  
異○二○儀○類○倣○百○物○則○顯○道○章○教○尤○於○是○乎○在○孔○子○歿○  
而○斯○人○賴○以○長○存○其○義○之○難○知○或○明○或○否○而○可○陳○之○  
數○如○此○其○詳○猶○足○以○生○養○斯○世○之○人○於○無○窮○故○後○之○  
報○孔○子○者○亦○以○其○所○詳○之○物○施○於○崇○奉○衍○饗○之○間○極○  
美○綦○多○而○不○爲○踰○思○以○盈○其○報○而○有○所○不○足○也○蓋○今○  
之○學○宮○棟○宇○之○制○擬○帝○王○之○居○而○服○器○之○有○事○於○廟○  
者○以○天○子○之○禮○樂○無○以○復○加○其○盛○矣○然○其○事○領○在○有○  
司○歲○月○傳○承○之○久○而○或○由○於○菲○窶○以○苟○具○甚○或○缺○而○  
不○完○廢○而○不○舉○則○一○物○之○細○而○亦○謂○之○未○備○也○泉○州○



儒學其地据郡之兌方最勝而廣袤先師之廟明倫之堂巍棟華宇甲於閩中。途闢四軌牆高數仞則礧圯巧剝往往有之。修廊穹門或櫺疏漉朽局鑰蠹脫而唐除澶衍潦之所鍾暑雨盛集類水上濫侵階及序則褰齊濡足以升堂士者病之。樽罍燹洗簋簠俎豆具善而丹幕櫨禁房跗有隳敝不全者。編懸之簾有枸剝牡甘設而不固者是皆出於菲與缺而不得謂之備也。顧官於斯者曾莫以爲意。華亭唐君堯賓來爲教授瞿然謀之士者以告有司之難爲患也。君獨任以已覽觀禮器周視廟堂門途得其患脫圯剝。



與夫隳剝不全不固者。以次治之。攻工攻式。非寔者。豐而廢缺者具矣。高頰水之梁。以出痺洳而捫其四旁。表門外之樹。塞以起入學者鼓篋之喜心。瑾竇窄徑。無使得邪。側蹊學而行堂上。丹黝煥乎明新。盡改昔觀。日課月試。舊嘗待諸生集。始索几於衢路。今惟携卷以入。則坐憑之具不移而俱足。凡有事於學中之物。可謂詳矣。因閱郡志。有宋名守梅溪王公。夫子泉詠詩。訪而得之。碣於泉隅。以存先烈之風跡。而刻詩於其石。約其費爲不少矣。而皆出於君之祿。可謂知急當務之所急。而爲人之所不能爲矣。君不自以



爲功而諸生必欲記之。學官之職。知教人而已。此非  
職之所有事也。君其爲踰職而過有所爲乎。夫語其  
費之所出。君誠過其職矣。語其事則職之所宜爲而  
非過也。將以習士者於道德之實。則禮樂之用爲先  
矣。而官室服器。聖人所以詳爲其物者。道之物也。陟  
降出入。作其對越。游居聚處。毓於藏修。濯漑奉持而  
肅敬萌生。考擊蹈舞而和樂交暢。則一形象一名貌。  
莫非道德之實。苟小有不備。非獨有事於廟中堂上。  
之所急而士者將缺其所以爲學也。君不憚損已而  
孳孳謀之。智固有以及此。與是可記也。



夏鍾曰學官勤于教人已爲難事况能不憚損已而謀及禮樂之器者乎宜先生之嘉歎不已也

余柏坡公平寇興學記

國家承平久隆浹阜康之盛莫如今日雖嶺限海帶越在遐徼如吾泉州之爲郡亦且生齒蕃殷地力竭作谷深山阻崎嶇而曲折皆有保聚之民墾闢之壤而玩忽涵養之過巨奸大慙往往伏於其間如果蓂大熟則蠹藏焉安溪故名邑也其治境之窮處爲白葉坂交乎潭汀諸州牙犬相入箐薄溪磳繚繞回複旣去治所遠而勢險可憑民之桀黠暴悍者穴而據之爲四遠逋逃之藪時出抄旁近村落吏漫不省以

爲細故日增月長。所聚旣多。旁近所抄不足滿其貪。嗜則出剽旁邑。南安永春之間。而同安之剽尤劇。至曳兵行城市閭巷中。若踐無人之地。俘民男女以爲質。而邀贖賂。兵革久弛。不逞之警起於非意。游徼虞候之將卒。掉眩相目。視其得志而去而已。是時柏坡余公新以按察僉事來巡此邦。慨然嘆曰。是非民之不逞。惟吏之不戒。以養釁萌而滋悖孽。使驕王如是。非盡伐其本。民其何賴。乃察文武吏之惰濫不恭者。懲之。而選其可用。使各募壯勇從行。公率以往。迫賊所穴而舍焉。自賊憑險爲穴。無一兵敢邇峒而竊睨。



不虞公之忽至也。急不擇死。糾其黨以與將吏鬪。而公所授策。其中機宜。又威令信必。激賞優厚。人莫不自奮。遂探穴俘之。林櫛而壑。難不失一賊。公則行視其穴。度所以絕其源。而圖爲久安之計。置壘設戍。增守禦之兵。而安溪與旁近諸邑之民。不復以盜爲憂。其功伐卓偉。計慮周盡如此。公猶不慊於意。曰。是徒致武民。未知義將若何。維詩書絃歌。馴習其口耳。以善其心。庶其鼓動者速。而變化之易。乃投戈休馬。卽學之官。進諸子弟於堂。問以所業。攷其得失。加勸董焉。而教之以爲父子兄弟者。使歸相告語。諭勉力於

從善以相收養而無狎於不義。顧惟教之所出。必在於學。適有議改。剏而工久不就。公覈其媮冒。旬月而諸役皆起。又爲拓地以廣面勢。而學之成完美矣。民莫不于于來觀。其秀者思游其中。以講學進德。其凡者亦歡喜誇說。見所未有。安溪之民幸脫於鋒鏑。枹鼓之警。而且得講誦游歌之樂。謂公之實有大造於我也。父兄以戒子弟。公之德我如是。其何以報。子弟以告其官師。相與謀曰。惟得世之能言者。論其事而載之。以永公之蹟。庶乎其可。夫世未嘗無事。而常待夫濟事之才。方同安之警。憂者固未敢度其勢之所



終之如何。公獨以身任責。爲民去患。數年不誅之。逋  
寇靖於一旦。使當時少憚勞險。不自深入。則不可以  
得吏士之効力。徒奮於一入。而無決勝之機。戒令二  
三。賞罰聲雜。則吏士雖致歿。而不可以成功。功成矣。  
而無分別安輯之略。則賊雖得而不免。玉與石焚之。  
慘人徒見公成功之敏。而不知其所以致之者。蓋其  
才有以待事之變。而然也。才之兼者。可以制事功。而  
未必可以興教化。公之用意。復出於是。究其施將使。  
文○教○昭○明○禮○義○興○起○以○爲○畜○衆○銷○萌○之○幾○而○向○者○卓○  
然○之○勞○烈○可○以○永○措○而○不○復○設○又○非○獨○其○才○之○過○人○

而已。是可記也。公本以名進士起家爲行人。拜給事中。以抗直忤權力。謫爲邑令。郡丞皆有廉操惠政。蓋其所養者正。而備嘗閱歷之益深矣。宜其過人如此也。請文者安溪學教諭李鐫。訓導孫統。實率一邑之學官弟子以來。而某爲之記。

夏鍾曰。平寇興學兩事。原不相涉。余公因平寇而及興學。先生謂學興則寇可永平。識議俱堪千古。

南安縣重修秩祀壇廟記

南安唐侯爲政之期年。補助興發。既有以佐民之急。使樂其生。然後教之以相親睦。收恤之義。服習戒令。蚤避而鮮犯。邑以靜治。乃始用其力於所可勞。而社



僂山川城隍之祀。以次修舉。棲主之壇。安像之廟。繚  
壇之遺翼。廟之室。木堅石密。崇碩麗壯。與夫齋舍庖  
廩。各得其所。如新作然。而器服之有事於祀者。攷之  
法式。無有不備。其財之所出。則民相勸。以多寡。期以  
集事而止。數入不待會而足。各執其役。以赴所事。嚴  
侯之命。如嚴于神。訖事之集。侯未嘗少見聲色。旣成。  
相與鼓舞。謠詠以樂之。莫有以爲病已者。方未事之  
初。侯以剝望之謁。春秋之祠。有事壇廟。肅恭蠲潔。介  
神之聽。顧其傾壞剝蝕。益慨然有意矣。益究度其所  
以勤於民者。至於期年而後。知其時之可也。茲役之

舉果以不勞而成。侯復有事於神。牲肥酒清。苾芬通  
徹。登降奠獻。始卒有容。肅潔之誠。有加於初。神益顧  
享。靈睨昭答。民未瞻視。歎慕悅喜。祥氣休鬯。疵癘不  
作。侯懼後之廢其事。而卒無以相民也。乃來請記。夫  
祭之爲義。深且遠矣。其最著而易知者。以爲民而已。  
有水旱之過。則社稷可得而變。順成之年。蜡始通焉。  
此其易知較然者也。民之所求乎上。不越憂樂欲惡  
之端。而憂樂欲惡。生於安危得失之際。先王圖民之  
所以安。爲之聚其所必得。其始必在於居與食。彼有  
欲惡之情。起於微。則祝慕驩嚮以迓其來。嘻嗟咈蹙



以送其去○亦理之必然者也○而彼不可使明者民也○故立之祭焉○使其望之於不能知之表面○而常冀之於可有獲之間○而祝慕驩嚮嘻嗟咈蹙之情○有所寄而無淫越壅闕之患○此其明之之術○而所謂鼓之舞之之教也○天子以命諸侯○諸侯以自建其國○未有廢此者○然君之所以致力於民○則有政矣○取予歛散○勸董誅賞○所以與民從事○皆殽於社○竅於山川○以爲降其施設○出於仁義之盡○而感通動於精誠之極○玉帛之沉燎○血毛之割瘞○猶其文之所爲○享而非義之所存也○至於風霆霜露○迭出而有節○暘雨寒燠之行○不失

其時以相從出作入息。寒衣飢食之求。無弗得所樂。而不逢其殃。則以爲神之所爲。而不知其政之出於仁義。有以導播嘉和。攘却乖凶。其始殽之而降者。終執其權以助其能。彼不可明者。徒以爲神之所爲也。民之所以與神交。有所有報。以奉歲事之常。滿其祝慕。驩嚮之所欲。而雩榮禳禱之禮。雖設其名。具其儀以待。將以宜其嘻嗟。咈蹙之情。爲之求去其所惡。而卒無所用之。是政之所爲貴上。之所以得尊於民。而君子之所以藏身者也。昔之學於孔子之門者。蓋講之矣。曰有民人焉。有社稷焉。他日復以事鬼神爲問。



嗟夫是猶未免貳於幽明舍其所以治人而謂有可  
事之鬼神則所事者將在乎玉帛血毛之物齊沐薦  
徹之節而取予歛散勸董誅賞之施於民以爲有司  
之法而已果其如此則所以治人而辯且嚴蓋府史  
之能其齋祓祇敬之接於神明何以異乎祝巫之所  
執蓋其義失而教存則賢者不免於惑而况於禮樂  
廢缺其數旣失之後吏不學道而有土與民是以卒  
無善治而民亦不可得而使而唐侯獨能奮於今日  
其出於政者未嘗不貫乎禮而著於祀者未嘗不通  
於事侯其學道者與故予樂爲之記且使繼侯而來

者○有○寤○而○不○惑○勤○民○而○不○爲○府○史○之○政○敬○鬼○神○而○不○爲○祝○巫○之○禮○而○民○之○永○有○相○也○其○亦○侯○之○意○也○與○

夏鍾曰從政說到祀從祀挽歸政從民說到神從神挽歸民一篇互發到底而輕重自見可云思深

企穎亭記

穎陽東溪相傳巢父洗耳處而箕山之上蓋有許由  
冢○疑○於○有○其○人○矣○彼○其○惡○於○以○天○下○累○已○而○逃○堯○之○  
見○求○宜○其○去○之○幽○昧○荒○遠○使○不○可○卽○而○其○生○且○歿○不○  
離○乎○箕○穎○之○間○豈○堯○之○仁○不○出○一○夫○之○所○守○不○待○去○  
遠○自○不○患○於○見○奪○抑○其○善○於○自○泯○能○使○堯○終○不○得○而○  
累○之○以○天○下○而○無○事○於○遠○去○是○亦○高○矣○吾○又○有○病○焉○



大其求之而迺迺之而不遠而能使其終見舍就若  
無使爲其所知而莫我求也高世之士天子有不得  
臣諸侯有不得友非謂其爵之而不降禮之而不就  
偃蹇傲倨抗其迹于巍巍揭日月以行其灼灼之名  
而以爲高也湛乎與俗同波菴菴今其與衆人皆愚  
覲面有不見其躬同席有不覲其形而臣且友之故  
不可得耳今將待其詞命之至而後以爲已汚艱然  
作於容氣顯與黃屋絕烏睹所謂高哉好奇之士猶  
侈然道之何也康衢之老人樂其食飲歌聲發於腸  
肺使堯聽其歌而不知其聲得其聲而不知其人是

吾○所○謂○高○也○當○堯○之○時○環○康○衢○而○處○者○皆○可○以○爲○巢○  
許○而○泯○不○見○稱○二○子○者○以○不○能○爲○高○而○來○堯○之○見○求○  
反○以○辭○而○逃○之○見○名○爲○高○而○傳○於○後○不○亦○異○哉○縉○紳○  
先○生○方○且○原○帝○堯○重○禮○之○指○決○其○事○之○無○有○以○闡○傳○  
者○之○妄○予○以○爲○正○使○如○好○事○所○談○以○爲○實○尤○有○不○得○  
侈○以○爲○高○耳○西○亭○君○作○亭○以○自○休○名○之○曰○企○穎○君○其○  
猶○眩○於○莊○生○之○誇○說○以○爲○甚○高○而○慕○之○耶○而○聞○君○之○  
名○亭○者○乃○始○粲○然○以○笑○曰○彼○二○子○者○與○之○以○天○下○之○  
大○而○不○受○西○亭○方○以○宗○室○之○胄○爵○秩○命○數○出○於○有○司○  
之○所○議○器○服○宮○輿○皆○自○上○予○之○也○而○奚○以○慕○二○子○者○



之風。夫匹夫之微，長於貧賤而不能侈於富貴。蓋多有之。生於富貴之中，超然獨離而不溺於其習，是可爲難耳。矯焉辭千乘之國，或不能不見色於豆羹一介，不受之誼，至爲細淺，而可以不愧於千駟萬鍾。不顧之大節。西亭君者，予及與之游而知之。其於富貴，蓋生焉而不溺。其好學自敏，知慎於分義之際，可以不苟取於一介。如是而作亭曰企穎奚不可者。笑者尤恠之曰：異哉！所聞康衢之民，皆過於巢許而宗室之富貴，乃可得而企之也。嗟乎！非聞者之不知，則何以記企穎之亭。

夏鍾曰箕穎不爲高而康  
衢老人爲高意義新奇

遊清源山記

登高望遠○攬山水之奇變○娛耳目於清曠寥廓之表○  
而宥然失一世之混濁○天下之樂宜無此踰者○牛山  
之遊美矣○而景公以之涕泣○沾襟不能自止○羊叔子  
登岷山以臨漢水○至與參佐相語○悲咽撫然而罷○何  
情之反也○以景公之愚○嗒然覽齊國之富○恐其一旦  
忽然去之○而歿而不得免○其意之卑○而晏子笑其不  
仁宜矣○叔子慨然顧其一時之功○愛而難忘○慮他日  
之易泯○撫當身之懽○而不足以自慰○可謂賢者其當



樂而哀。以身爲累而不得盡悅。生之情亦何以異於  
不仁者之悲。嗟乎富貴之君侯功名之卿士窮天下  
之欲無所不足。志滿氣盛。其多取於物而備享之以  
爲快。何所不得宜。其兼得於山水而牛山峴首之勝  
反以出涕而興嗟。彼其念富貴之可懷而傷其不得  
久。有喜功名之甚。冀於垂永而患其無聞。則雖左山  
右江。履茜萃而俯濤瀾。而不能有其樂。寧獨不樂而  
已。且爲之感慨而哀。孰知夫蒼厓翠壁。發舒氣象而  
凌薄光景。亦導憂增戚之物也。當其戒具往遊。固以  
酣乎奢佚之驕美。倦乎勲伐之勞勤。思取樂於山水

之○間○以○適○耳○目○之○娛○卒○之○求○須臾○之○樂○而○不○可○得○豈○  
非○以○其○所○都○者○厚○與○所○挾○之○高○起○於○濡○戀○矜○顧○而○然○  
耶○富○貴○功○名○者○之○於○山○水○其○果○不○得○以○兼○取○也○清○源○  
山○者○泉○州○之○名○山○也○余○嘗○以○暇○日○往○遊○於○其○間○好○事○  
者○往○往○撰○肴○酒○躋○山○之○顛○就○予○而○飲○食○之○因○輒○相○命○  
爲○遊○攀○援○險○絕○探○討○幽○竊○極○意○所○止○有○從○有○否○不○爲○  
怵○也○顧○視○其○蹢○躄○寂○寥○崎○嶇○而○盤○桓○何○足○以○望○牛○山○  
之○儼○從○峴○首○之○賓○僚○然○吾○未○嘗○不○樂○而○客○之○從○者○未○  
嘗○不○與○吾○同○其○樂○也○以○吾○之○早○廢○於○時○習○於○富○貴○之○  
日○淺○而○頑○拙○不○適○用○曾○無○秋○毫○之○長○可○以○挾○而○待○後○



欲爲濡戀而無所可懷○欲爲矜顧而無所可喜○而山水之樂○卒爲無有○吾雖困於世○於物無所多取○而獨得之於此○彼富貴功名者○於天下之欲窮矣○而於天下之樂○猶有所憾○然則吾之困○非徒不以易千駟之君○而烜赫震耀聲烈○被於江漢○魁乎爲一代之元卿○者○猶將藐乎其小○如卷石寸木之在於茲山也○吾之所取其○亦不爲少○歟○旣以語客○復記之○如此○

夏鍾曰○牛山峴首○當樂而哀○度量不甚相遠○孰與先生○早退於物○無多取○而獨得乎山水者之樂乎○

### 龍巖書屋記

貴州天下之微也○天下之山○莫雄於貴陽○貴陽之山○



之秀莫秀於永寧。唐帽之山於永寧爲尤秀。龍巖者唐帽之最奇峰也。今方伯趙伯帥君永寧產也。愛唐帽之秀而得其奇峰。作室於峰之陽。題曰龍巖書屋。其愛之甚也。取以爲號。君旣以文學顯於朝而暴揚其事功於數路之藩臬。天下之人莫不知君。則皆稱曰龍巖先生。而永寧之龍巖遂爲天下所仰。貴陽微地。視中州有加矣。夫出丰秀於龐雄之餘。而特露其奇。儲精蘊異。以厚斯人之生。是君之有得於茲山也。若其强立振曜。始於戶庭。修明而發聞於四方之遠。非山之能爲。而君之所自成也。龍列於鱗虫而爲之。



長以其有形而出之也。要其伸縮藏見。恢怪倏忽。窮變化之端倪。而獨靈於天地之內。非虫之所可類而列也。貴陽諸山士人。往往見其上有龍之蛻骨。意其高大深遠。足爲靈物之所栖托。龍嘗擇而蟄焉。茲巖之以龍得名。固宜。或曰。山之蛇。蝮。螭。螭。磅。礪。首。尾。鱗。爪。飛翔。攫。拏。依。希。而。彷彿。爲。其。象。於。龍。也。擬。其。形。而。名。之。亦。宜。謂。其。有。是。物。也。與。其。擬。是。物。之。形。也。皆。非。巖。之。所以得名之實也。龍之起潛躍淵。馮游氣而得便勢。混。垓。乾。薄。景。光。觸。石。膚。寸。之。雲。俄。而。彌。濩。風。霆。受。其。駕。鞭。瀕。洞。海。江。歎。欬。陵。谷。不。擇。下。土。而。降。其。膏。潤。高。

三才圖會  
卷之十一  
下之地巨細之物既皆浸灌沾渥盈其所受已而氣  
收勢歛還宇宙之舊觀靡然開靜萬彙欣暢不知誰  
之所爲龍亦泯其靈迹蕩然無復生成之賜於羣有  
而責其報謝此其功之所可名者也惟其純剛德之  
粹精乘凌二氣噓陽吸陰絕無嗜好之欲以錮其形  
合而成體在體無居散而成章於章非見此龍之所  
爲神而能有是功也始君讀書於茲巖隱而未見懷  
負所有固自謂伏龍今其光輝聲迹昭然於世又孰  
不仰君爲人中之龍者行且有國家之大責而得其  
司柄氣至勢便固其時矣使其功業不見於當世而



澤不下於民是夏蟄而田潛也於是而猶據大位享  
厚祿偃然坐於廟堂之上盤桓瞻顧而不能釋斯爲  
有夏之世之產受鬻於劉氏蟠屈庭戶盎缶之間無  
異蟬蛻之生徒知食飲以有其形辱而虫之不虛也  
君尚充其昔日之所以自謂者純龍之德以顯行其  
功塞天下之人之望且無貽茲巖之寵毋使予得移  
文○草○堂○題○茲○巖○之○龍○曰○豢○也○君○其○圖○之○

夏鍾曰責善朋友之道勉其爲躍慮其爲豢先輩  
贈人之言不忌諱至此使在今日恐遭按劍矣

### 環山樓記

太白源於崇陽之野爲佳勝處土沃而泉甘平疇廣

隰彌望迤靡疆畔縱橫有理如畫置也四外皆山雄  
據矗起卓爲奇峰列爲聯嶂殆不可數最巨且秀而  
可舉以名者曰龍頭羊角石洞烏土葛仙城岡兩山  
詒軸壺頭大集之山田於其原之上游築圃曰南莊  
而因以爲號者處士劉公某也因莊之勝爲樓於其  
中以攬取四山之美名之曰環山則處士之子封君  
龍溪公某也受田於南莊付授有法樹藝以時其收  
穫之入足以食農人烝衍祖妣而無奔走之憂經營  
之勞以奪其暇日此樓之所以得常止而休也田壤  
所隣生聚衆而守望勤旄倪往來訢合而有禮怨斃



之危構訐之械不設於彼我此樓之所以得長保而  
安也南莊之田日闢以增無旱風之灾而有積倉之  
餘斥其所易可以具酒食召賓客此樓之所以得屢  
游而嬉也出作而入息絕身外之規覲以其有爲之  
志託於其子詩書之業顯而功庸漸以發聞於世雖  
壑、枯、川、觀、不、爲、無、所、用、而、徒、隱、此、樓、之、所、以、得、享、盛、  
而、盛、也、有、名、寵、之、榮、而、無、機、事、之、累、冠、裳、車、馬、之、命、  
數、以、爲、倘、然、而、不、以、爲、實、有、宿、乎、富、貴、之、遽、廬、而、不、  
繫、於、驕、豢、之、柴、柵、此、樓、之、所、以、得、尊、居、而、高、也、高、人、  
勝、士、之、產、於、楚、者、挾、能、賦、之、才、而、矜、好、事、之、雅、荆、潭、

襄岳○四遠而至挹奇變而凌光景○因之裔析名理○發舒性靈○刻羽流徵之詞○滋蘭藝蕙之些○盈於楣牖○此樓之所以得播美而名也○嗟乎以鄂之爲州方地且千里○山之環合而可樓者○不知其幾處○樓於山中者○不知其幾人○得長保焉○以常休而屢嬉○吾意亦鮮矣○其享盛而樂尊居而高者○抑又鮮矣○况於美而名者○又可多見耶○凡土木堅好華潤之作○常必選地以爲勝○故喜事者窮搜遴擇○不厭其意○不止卒之○其所以勝○又不在地○視所以作而居之者○人何如也○人與地稱而不託於言○與言之不工○其地雖勝○亦不足以廣



行而久傳。今劉公旣以其樓勝。而余復爲之記。其樓不爲徒也。

夏鍾曰。烟雲非女子之氣。草木盡王者之兵。當作如是觀。

### 聚樂堂記

世之所謂樂者。可知矣。粉白黛綠。雜進迭侍。衿襦墻珮。交於几席觴俎之間。而不知夜之將旦。則悅色者之所樂。而夸者訾其內。極意六博。叫臬盱盧。擲手交臂之頃。車馬乘徒。離合於一枰之上。百萬爲擲。曾不足以盈其一睨。則博奕者之所樂。而豪者嫉其辟。擊槊試劍。砉然雷奮。颯然風靡。始陽卒陰。術殫於角。而

勇力泰至乎多變。其樂進於技。而以豪自喜。不虛也。有嗜圖畫。鑒古玩物者。過而哂之曰。是何麓猛而近鬪也。則發秘塚壞壁之藏。芻搜而善購。一珍一異。聚徒縱觀。以炫博而長價。自以其樂在乎藝與能也。又有譏其側者。風騷自命之士。矜才於形容。盡態於藻績。此唱彼和。騁奇競巧。當其元本之冥思。模寫之妍狀。可以廢食寢而忘昏旭。彼鑒古者之所好。蹴然退舍。而知其不足稱矣。儒者猶且非之。則樂之所至。豈有涯哉。西亭君築室以居業。貯書數千卷。百家衆技。稗諧小說。佛老異典。莫不畢具。其要在於六藝詩書。



之文畫誦夜諷。矻矻焉竭其心思之所極。恍焉而前疑室焉。而中悱意挫。形頓而不敢休。客非有事於斯文者。不得闖其戶。非但歌舞博塞技擊之。以內辟簷猛見誚者。無所干於斯室。而玩物好事之間。適與夫締繪章句才人一伎之工。且以爲壯夫所悔而不足爲也。當其覃精於一息之近。而妙契乎千載之遠。若古人之在。而與之爲酬酢。客之以斯文至者。攷證辯說。窮浩蕩之倪。而析抄忽之端。自以爲舉世之可樂者。斯若也。名其堂曰聚樂。以書至清源山中乞記。夫生於宗室貴富之家。則營於歌舞。放於博塞技擊。

而不患乎內辟麤猛之誚。以其居養所致然也。有能鑒古自適。琢句爲工。則可以自拔倫輩。而爲學士大夫之所道。君所爲樂。乃在此而不在彼。至樂之涯。其果不出於斯堂之所求與。嗟乎。是書也。吾見夫讀之者之多端。而所以致其樂者不一也。得之者以善性而失之者以溺心。悟之者以反本。而徇之者以滅質。方其悅於博。而耽於文。則心愈溺。質愈滅。而愈足以爲樂。吾又安知是書之不爲聲色之娛。博塞技擊之靡。而何以賢夫鑒古琢句者之所好耶。君誠以而自究焉。則今日之讀。因向日之書也。今日之樂。有



非向日之所樂矣。客之來者有適然而忘於所知。亦有矍然而惑於所見者矣。然後謂之能窮至樂之涯。而不復爲過者之所譏。如是則請西亭君終日讀書於斯堂而勿輟。

夏鍾曰。讀者多端。而所以致其樂者。不一。讀書家不可不知。

### 遊筍江記

郡侯程習齋公治泉之八月。政旣通矣。天答之歲。而民悅其生。公乃得與客遊於筍江之潯。夫其浩漾澄涵之水流。日夜之不息。演洋泅泆。放乎大海。浮於曲折迤邐之遠。不知其幾百里。而空曠寥廓。際乎目之

所極。若在几席之外。膏原漫隰。彌望透靡。畫什伍而  
理縱橫。巒驤峰踴。迅勢驟形。凜乎其不可控。臨兩涯  
而四眺。則若逗若拱。徊翔停峙。睠留而不去。各獻妍  
態。映燭乎玲瓏泓澈之間。而光晶新爽。飛散下上。媚  
雲氣而麗烟霏。蓋亦奇矣。若夫高帆疾艣。出沒於霧  
濤風浪。相銜首尾。而離離漁篷釣艇。謳嬉遞發。前唱  
後和。擊楫空明。魚沉而鳥起。川虛山蕩。於微茫掩靄  
之中。灌木菀柳之駢羅。鸛鵲棲止。鳬鷺還集。輕簷細  
栒。隨曲成構。延亘亓復。鑑晴波而漾倒影。斯則民事  
之動。因乎山水。而公與客得以爲環傑。談怪之觀者。



也。至於靚粧絃服。會一州之士女。沿隈循溪。而不可  
選。分散互合。莫窮其來往之所從。文蓼芳荃之繽郁。  
遺履舄而望。珪裳激豪吹之清越。哀繁絲之要眇。淋  
漓顛倒。徒倚雜遘。忘其岐道之所向。而忽乎日之將  
夕。斯則生人之娛。感乎物節。而公與客。又得以同其  
歡適。欣洽之意者也。公飲酒樂甚。顧謂客曰。吾所得  
以爲觀者。彼方勞於有所營。役役而不得休。而豈知  
是之爲美。而吾獨得之以爲遊。娛於物節者。之以爲  
遊矣。徒徇乎耳目之好。而甘於漿炙之味。而烏知吾  
之所樂。惟我能與之同其意。而彼豈誠能同於我哉。

今日之遊。蓋亦云樂矣。然而此江常在。泛日月之無窮。前乎遊此者。不知幾何人。而聲磨跡滅。與水俱逝。皆已化爲浮漚游泳。而不可尋矣。不有文字以托於不泯。則後之人。孰知吾與公等之樂於是也。乃舉酒屬予曰。子宜圖之。予復於公曰。昔叔子峴江山公習池。與夫柳惲之具區。蘇子瞻之西湖。其光景物象。備極一時之美。文雅照耀。意氣雄俊。旣檀絕於當日。而流風餘韻。於今猶可稱思。至其從吏鄒湛。侍兵葛疆。以及方外惠勤。參寥之徒。皆因以不沒於後世。然則客方有託於公。而此江雖常在其名。或當由是以顯。



公顧謬意鄙陋無能之文爲足以圖不泯之盛事。豈  
不過哉。言已酒罷。公揖客別。而予退爲之記。

夏鍾日艷而  
韻興致勃勃

### 金溪遊記

一畝之宮。環堵之室。堦陰而牖明。畜妻子其中。而身  
與爲處。出戶而行。前有擊轂之車。而後有連帷之裊。  
驟而之乎空曠之野。寂寞之濱。蒼山翠嶺而高起。綠  
波澹蕩而長浮。則爲之忽然而喜。如出幽室。脫縛束。  
耳目爲之加明。手足爲之改適。此何異乎飫粱肉者。  
悅蔬茹之食。酣醇醴者。啜清冷之漿。其舍醇釀而卽

疏泊而不得謂之知味也。由其無所得於此。徒以迫  
劫於喧湫。磬雜之甚。意煩氣倦。急於有所投而自解。  
峙者知其爲山。逝者知其爲水。而豈爲有遇於已哉。  
嘗試登高丘。汎長川。見夫樵夫牧豎。畧師估人。爭道  
而捷馳。疾榜而擊汰。以家爲赴。望望然不及如其去。  
山水之不速。而恐其或後。以彼觀之。則醇釀之可舍。  
因在山水。而城郭室家。其疏泊而思卽者矣。物之美  
惡。無常態而有定形。山水之爲佳。而城郭室家之爲  
垢濁。亦美惡之大齊也。由樵夫牧豎。畧師估人觀之。  
則所謂佳與垢濁者。舉易方而慎處。世之偶得放於



山木輒自謂絕去喧湫啓雜之患。方多其所遊之適。以傲乎城郭聚而室家居者之人。吾亦未知其美惡之所常也。飲漿冷者暫快而非甘。嘗蔬食者少蘇而不美。其甘美之常固在酒肉也。彼驟之而忽喜者。意豁於久煩之餘。氣舒於積倦之後。喜且未幾。厭已生矣。何必不爲樵夫牧豎。罾師估人。而何以笑彼之望。凡物之美惡無恒。而人情之欣厭有向。昧者挈情以徇物。中之厭欣變於外之美惡。迭欣迭厭而不知自主。惟明者爲能以情御物。物變於外而不足以易其中之所樂。樂之取於物未嘗無所寄。而皆其自足。



於中者之所取則惡者未嘗不美。而况於其美。然後  
美惡者卒歸於有恒。而皆吾之所御。欣且不得而有。  
而何有於厭。苟其無所厭。則遇物皆適。無之而不善。  
而奚待於忽然。蓋吾泉州之江。自諸山發源而下。建  
瓚而急瀉。至於金谿。而始演洋。渟潏。山起於兩溪。高  
深之景相得。草樹互映。雲烟相鮮。茲亦山水之勝處  
也。之焉而忽喜者。不知其何人。而吾獨與黃應初洪  
舜臣二君。往遊而樂焉。當其舉杯相屬。唱咏方希。而  
諧笑間作。計彼驟之而喜者。亦必有以同乎此。而山  
之塊然而靜止。水之沛然而流行。接於吾目。著於吾



心形器都遺而情神獨遇。信有彼所不能同而吾三人者亦可以目擊而交存而不可以口說喻也。然而其樂可以忘言而其遊不可以無述。故予爲記其意如此。使世之遊者知吾三人者之遊而能樂。蓋有以御乎物而談山水之美者。必出於吾而後爲山水之美常也。遊之日爲嘉靖戊申八月七日。應初名淑清。南安人。舜臣名朝選。同安人。而予晉江遵巖居士王慎中也。

夏鍾日摹情布景  
宛然一幅畫圖

### 潛源記

新安汪君號潛源。間謁予。欲記之。而其所自言曰。新安萬山之會也。吾所居據其高且奧。常好行於其野。以舒吾目而寓意焉。當其雲雷始霽。雨潦方集。水發於列岫之間。挾盛氣而賈餘勇。奔恣橫放。汨瀟潏潏。驚而爲波。決而爲瀾。木驟石轉。洶其可畏。至於滂溢濫肆。或迫蹙於隙厓之犯據。或舐觸乎岷嶠之突唐。潰亂激射。衝蕩凌嘯。不能自平。而快於爲傷敗。可喜可愕之形。須臾百變。何其壯也。旦夜方改。已消盡無餘。向之所見。今忽失之。如是者。雖見爲大水。而患於無源。又嘗觀於其江。經流滔滔。閱寒暑晝夜而不息。



舟楫乘載浮於其上。首尾相屬。不患於涸竭。槁滯而  
有涉濟之利。原陸園田資灌溉於其涯。大酌小挹而  
無所不足。而其涵光浴景。納吐日月。映燭羣象。清瑩  
澄徹。可以數毫髮而鑑形貌。如是者。可謂之源而不  
得爲之潛。惟吾所居數里而近。有泉出於山中。榛莽  
蒼葳之所。蒙翳沙礫沮洳之所。淆雜涓涓而微行。皜  
皜而自潔。蒙翳之所不能塞。淆雜之所不能污。迫而  
取之。若無所有。徐而俟之。又已有餘。驟而迎之。殆不  
可見。隨而將之。未始有窮。吾以謂是源也。而潛故愛  
而玩焉。久之而樂樂而不能舍。此吾所以獨得於此。



而不能以告人而與吾處者知吾之樂此也久遂名  
吾爲潛源居士而忘吾之名雖吾亦自忘其名而但  
知其爲潛源之主人也嗟乎汪君之取於物者可謂  
卓而其命乎名者可謂約矣夫材力驅駕意氣鼓舞  
之士可以悅目前快當身而不可以持久卒於摧磨  
虧喪而無成而蹟効出於所養之厚明哲發乎所識  
之著興事及物可謂有成未免乎動於用而離其本  
汪君所以觀於其野之大水與夫長江之經流皆有  
所不遇而歎有契於斯泉嗚呼其知之矣如是而取  
於物良有益乎志而命乎名者蓋精於義矣請以是



爲君記

夏鍾日疏  
剔自佳

故太常博士鄭君贈典制詞記

皇帝嘉靖十有 年某月某甲子太常博士臣鄭一  
鸞滿其官之考三年以其績上吏部考功吏部覈具  
博士官績以聞皇帝若曰惟余欽于天地宗廟百神  
之祀太常實典其儀章品物厥著勞效宜有推卹以  
示褒勸事下吏部司封吏部按令甲所著循令以請  
於是博士之父某宜贈太常博士母蔡氏宜贈孺人  
報曰可中書其撰制詞代余言垂寵錫焉詞未上而

博士以疾卒於官中書不敢廢其事上所撰制詞尚符璽奉寶以行詞下其詞仍錄副以授故鄭博士一鸞家人家人受詞告第存其副以待墓焚而博士之弟臣一鳳以材舉於鄉當計偕入京師未及焚副也比罷南宮薦歸一鳳奉詞及副悲感雪泣曰惟先臣某含真蹈義抱德弗顯以有臣兄惟臣兄一鸞率志飭躬底懋厥職揚于王庭以知有臣父明主不卑小臣錄勞閔孝原本所自褒及幽遠不遺死臣用終恩命奉行之吏罔敢怠廢畀茲制詞如臣一鳳賤貧自情不卒厥事以戮斯禮是無以光昭君賜隱兄之志



而沒先人之德也。乃以二十三年八月某甲子焚其  
副墓上室中之主。敬易新題。具如儀式。而臣某與觀  
其事。一鳳懼速湮沒。後人不聞。再拜請曰。願有述也。  
庶詔後人。使知所繇。以教不忘。臣不肖。常待罪禮部  
祠曹。掌隸太常。知其牲醴幣玉。罇銅簠簋鐘鼓翟籥  
之器數。凡郊廟之祀。當與侍儀御史。察其如禮與否。  
常得降陟壇壝。出入奧阼。以觀大事。備窺皇帝一德。  
欽明於穆維禎。知祭爲有益。而不敢忽之意。患  
文吏有家室。畜妻子。恐不蠲潔。非所以佐禋祀而贊  
昭格。盡易置太常卿貳。而以道士爲之。而其儀章品



物有難知之義。道士不能具曉。故兩博士仍置文吏。博士於鄉貳爲屬。道士慚不能曉其義。每害其能。而博士之職。其難蓋十倍於他日。一鸞嘗爲其長所中。下獄幾不免。賴聖明察其無罪。而有勞。復其官。因得滿其官之考。以有茲褒典。蓋大小臣工有服在朝。滿其官之考者。於令甲皆能以資秩所宜得。推及父母。若常制。然不爲異恩。而爲太常博士於今日者。能滿其考。無罪而有功。實難於他官。鄭氏之後人。尚有考於此。路戴鼓舞皇帝之賜。宜永永無極。而博士臣一鸞効職之勤。益以明白矣。臣其故備而論之。以授一



鳳俾藏於家

夏鍾曰典雅  
仍是制詞氣

晉江縣題名記

晉江縣舊無題名而有題名者始于嘉靖二十一年  
邑令貴溪汪侯宗之之所爲也始侯至縣屬長吏久  
曠之餘務弛蠹弊叢沓委頓歲又大饑侯補助收救  
抉剔湔滌治功滋起民用大和乃以其間申命衆史  
蒐獵牘書考前爲令者二十九人得其名氏官里伐  
石鐫之立諸治堂之左以待來者而以記屬余其言  
曰自吾爲此常憂邑之繁鉅而懼其不敏問地於畝

而田之以頃計者五千。問民於版。而男女之以萬數者。餘三十。問士於學於塾。而弟子之以業名藝占者。至數千。可謂地大人衆。而禮樂物軌。誅罰勸賞。禁戒教令。行於其間。則令之施爲。非惟民所由利害也。當世之治。亦將有考焉。吾之爲此。非謂其力之足以獨決而專濟。蓋欲考前人之爲。取其効見於事。愛在於民者。以自勉。以與人同好。而共其利也。故知其人。則欲求其事。以見其良法善政之所存。得其事。尤欲講其人。以追其流風餘思。於不泯。故雖當官曠歲儉之。際勤於有事。而獨不敢緩乎此。且使好古之士。爲今



之吏用今之民。欲以得志於治。非變禮易樂。擅刑出  
賞。宜弊以得志於治。又勢之所不得行也。藉令處得  
行之勢。非漸之以馴久。遲之以歲祀。猶不可與於成。  
今制官以九歲爲任。而此二十九人者。在任之間。或  
陟或罷。輒以舍去。無有滿制而任者。其變易之數如  
此。雖有聰明彊固之材。亦且因時便事。營民所急。以  
就當身之功。孰能操意悉力。措無窮之慮。以俟難必  
之時哉。有誠心如古之人。則遵法於今。而媲美於古。  
亦何所不可。龔黃朱召。漢所稱循吏。其爲政刑賞禮  
樂。豈必盡合乎古。正使古之爲吏。亦何以加焉。在職



之久○近○非○可○以○自○斷○要○以○盡○吾○誠○心○而○止○苟○其○一○日○  
之○在○而○不○敢○以○不○盡○此○吾○之○志○也○夫○樂○前○人○之○善○而○  
思○與○民○同○之○又○不○稱○其○不○善○者○其○意○良○美○所○自○爲○志○  
尤○非○俗○吏○所○及○是○可○書○也○昔○漢○高○惠○

文○景○繼○體○遵○業○循○吏○之○盛○始○見○於○孝○宣○中○興○之○世○桐○  
鄉○零○陵○成○都○膠○東○皆○吳○蜀○萊○楚○遠○絕○之○域○循○吏○乃○在○  
其○境○今○上○嘉○惠○元○元○申○儆○吏○治○方○有○意○於○勵○精○之○功○  
而○晉○江○僻○在○粵○徼○後○之○傳○循○吏○者○宜○有○取○於○侯○於○其○  
時○事○甚○相○類○然○傳○於○文○翁○佚○其○字○王○成○佚○其○州○邑○而○  
此○石○之○存○侯○之○傳○其○可○以○無○佚○矣○余○旣○述○侯○之○言○而○



復論之如此使來者得考焉

夏鍾日純是  
西京氣脉

修天妃宮記

所謂神者果有物哉。君蒿盼嚮飛揚浮游。昭明在上。充塞擊觸于四旁。非無物也。危困之所籲號。疾札之所請禱。忽然有接於人。其精爽翕霍而狀象彷彿。莫不神之以爲是有物焉。拯危困爲安樂。化疾札爲全。而崇事報享之儀由之焉。起嗚呼。此民之所以爲不可使知也。其有接乎彼者。固其籲號迫切之專。請禱誠信之篤。自爲其神感於其心。忽然有動乎耳目。

而○以○爲○有○物○焉○則○過○矣○方○其○專○且○篤○也○其○人○之○所○自  
爲○與○或○爲○其○父○母○兄○弟○妻○子○惟○其○所○爲○者○之○存○乎○心○  
而○他○不○存○焉○昔○日○之○所○膠○擾○抹○鍛○滑○撓○其○神○者○一○旦  
蕩○然○不○存○乎○心○而○神○爲○之○告○豈○有○異○物○哉○然○世○之○人○  
固○舉○謂○之○爲○有○物○矣○於○是○搏○土○斲○木○爲○其○形○容○寵○之○  
名○號○原○本○氏○族○廣○衍○景○蹟○以○附○是○物○而○穹○堂○粵○室○大○  
庭○高○閼○以○居○之○患○其○不○稱○也○剗○羊○椎○牛○沈○玉○瘞○帛○爲○  
其○饗○侑○伐○鼓○撞○鐘○被○巫○紛○史○爲○其○歌○舞○奔○走○竭○蹙○天○  
下○之○人○惟○神○之○歸○嗚○呼○斯○民○之○不○可○使○知○其○亦○久○矣○  
故○先○王○爲○之○著○其○教○善○其○報○事○之○文○使○之○鼓○舞○而○不○



倦以勿陷於淫諂譖罔之邪。蓋始之所以有神者。本  
生於其人之誠。而教之既設。則人莫不歸是神也。而  
後能勉於爲誠。使其崇事之嚴。報享之厚。一出於忠  
利。憚畏之本心。則去非遠罪。無卽於凶。疊疊趨往。以  
赴疇祉。惠廸之會。若有爲之掖導。閉止。是莫不起於  
斯人之所自爲。而由於歸是神之所爲。勉則土木形  
容。亦聰明正直之所憑。而何邪之有。泉州之有天妃  
宮。其來已久。海上尤神之。故宮於吳越閩廣之間。尤  
多。成祖文皇帝時。嘗遣內臣齎大賚。譯賜島外諸蠻。  
隨以重兵便宜討其不庭。蠻酋讐悚。受賜奉約束。使

節所指遂窮日出之域。神最有光怪靈變。使者奉之  
謹。故泉州之宮內使張謙修建也。閱歲積壞。前廊後  
室圯而爲墟。惟門堂存耳。而稅剝榱傾支朽楹茨頽  
垣以禦風雨。殆不蔽也。其不至於毀無幾矣。報享不  
虔。民咸知病之。神獨見夢於邑人徐槩。乃以民之病  
告以神意。民樂率錢以佐役。堂宇聿新。殿寢崇成。顧  
役鉅費繁。率錢猥微。門廊猶不能興也。郡侯童南衡  
公始捐俸以充其費。免民率錢。俄頃之間。高門駢將。  
廊序有列。而宮完矣。郡民懽喜忭叫。爭走睇瞻。願記  
其事。則相與謀。因徐槩來請於予。予謂極治之國。其



神不靈蓋政之所以得民者爲之興便布利除攘患  
害民不祈而得其所欲不攘而違其所惡籲號請禱  
之誠無所用之而烏有異於神然先王猶存其教所  
謂鼓之舞之使之不倦順其不可使知之情而誘之  
於勿邪焉耳侯爲郡旣久災癘不生寇賊銷逃遺四  
境以安樂生全之福神將無以爲靈則斯宮之完修  
殆予所謂存其教誘之勿邪之義歟斯義也固非民  
之所知不可不著以告後之爲政者故記之如此

夏鍾曰靈心奇情密理  
幽致讀之悄焉動容

### 壽社堂記

侍御馮君子仁作堂三泖之上。奉其母太孺人居焉。名其堂曰壽祉。堂之始作。侍御君新以恩放還南海。上天下士大夫莫不喜諫臣全身過嶺存以光天子仁聖之顯名。雲間之長幼相與慶於路曰。吾鄉直臣還矣。以爲其邦之榮而推其美之所由。曰有太孺人之教焉。交欲謀所以爲太孺人壽者。以貺嘉馮君之直。君亦自以譴徙流離。悟於嚴錮而久不得養其母也。思竭其力爲太孺人懽。選地最勝處治堂爲安老之所。而雲間之人不愛出財與力以佐侍御君之費。於是堂成而崇麗用於郡中。是時太孺人年八十餘。



矣。耳目聰明。齒髮堅好。順棟宇陰陽之制。以節宣冬夏之涼溫。庭柯砌卉繁茂。幽馥四時代變。而皆有可玩。臧獲紛敏。器服完好。稱其所趨。而無不得適。動息之所宜。愉懌而恬。朝夕之飲食。加進而雲間舟楫之便。足以集四方水土之產物。君必致其珍。以羞朝夕之享。旦暮率其婦子。以寧堂上。左右無方。歲時之吉。族姻士女。會慶於堂。則輿馬填咽。裾佩襜褕。郁如也。君歸慶高堂。謂非母氏之懿德。令善則胡以介斯祉也。太孺人跪。君堂下。詔之曰。吾始教汝。以直汝好。直而不得其方。徒以狂慙。杵雷霆罪。在不赦。賴上聖寬。



仁○昇○汝○以○身○又○終○使○汝○得○有○此○堂○始○將○示○天○下○好○直○  
者○始○獲○罪○而○終○受○賜○以○勸○在○位○意○在○斯○乎○上○之○賜○汝○  
厚○矣○君○懍○然○以○思○朝○夕○起○居○太○孺○人○於○斯○堂○有○明○發○  
之○懷○而○又○不○敢○忘○匪○懈○之○忠○也○郡○邑○大○夫○與○四○方○賓○  
客○慕○君○之○風○者○登○其○堂○知○其○恭○養○之○隆○可○以○興○斯○人○  
之○孝○及○其○聞○太○孺○人○之○誨○言○也○又○知○所○以○有○堂○者○之○  
賜○而○勸○忠○之○義○由○斯○以○存○天○下○之○母○孰○不○欲○享○子○之○  
豐○腴○今○而○後○知○教○直○者○所○以○積○豐○享○之○基○人○子○亦○孰○  
不○欲○極○親○之○康○悅○今○而○後○知○直○節○者○所○以○得○爲○悅○之○  
具○斯○堂○之○可○觀○豈○直○木○堅○石○密○華○鉅○輦○革○之○間○而○倡○



動感發之所係。有不在馮氏一門之美者矣。某與君同賜第於朝。有通家之誼。恨不得登堂稱一觴。爲太孺人壽。敬爲之記。以寄慕祝。且以風世之人云。

夏鍾曰。能爲直臣者。必能爲孝子。造化於此。定不昧昧。

### 曉江漁者記

江潭大澤之畔。緇帷杏壇之林。皆有人焉。顛白眉龐。杖拏鼓枻。而見爲業漁。三閭大夫之貞。尼丘孔子之聖。僅足以發其人之一盼。而問之躊躇高視。迫而後荅。若以一賢一聖者爲未足與語。其放且傲如彼。彼所謂頽曠淳野。沒於眇莽遙蕩之遊。惟其鈞餌之知。



而鱸魴之索倫類不可得而拘○詩書不可得而詔者○  
耶○然而出而見於澤畔林中○蓋非大夫之所訪孔子○  
之○所○求○而○彼○微○示○其○迹○以○啓○其○端○又○非○其○偶○然○過○而○  
相○遭○者○說○之○既○竟○而○其○意○見○矣○乃○始○泯○形○收○聲○而○去○  
欲○質○其○姓○名○與○其○居○舍○之○所○止○而○卒○不○可○得○吾○又○不○  
敢○逆○處○其○爲○治○釣○餌○而○謀○鱸○魴○之○獲○者○之○人○也○嗚○呼○  
彼○且○被○髮○龜○手○而○老○於○風○波○之○上○荻○葦○之○間○其○果○何○  
爲○者○耶○吾○既○不○得○見○其○人○而○見○所○謂○曉○江○漁○者○吾○之○  
於○漁○者○蓋○往○訪○而○求○之○而○後○得○見○也○於○是○有○可○傳○道○  
之○姓○名○而○有○可○蹤○跡○之○居○舍○矣○漁○者○之○於○漁○足○未○嘗○



履舟手未嘗操櫓而終日未嘗得魚也。吾以有罪黜於時，猶不能忘其憤，常抱直被廢而正見疑之懟。不知所以自釋，然後進而求於孔子之道。誦說詩書，蹈習禮樂，以自苦勵而休其不平之怨。以此其陋，使其逢澤畔林中之人，當不足以辱其一盼。而何問之可得？漁者方且以詩書禮樂之言強聒而博喻之，惟恐吾誦說之不勤，蹈習之不固，而其感於廢興之由，理亂之故，往往扣舷蹙歌，聲薄林莽，有餘悲者。使吾始悅而中疑焉。漁者其猶未足以方於澤畔林中之人歟？胡爲使吾得求其姓名，訪其居舍而與吾言之多。



且○盡○如○此○嗟○乎○此○漁○者○之○所○以○爲○漁○者○也○歟○無○方○之○  
爲○有○方○者○語○無○當○焉○則○驚○過○焉○則○惑○漁○者○之○爲○吾○言○  
固○當○如○是○而○止○爾○他○日○吾○又○訪○焉○而○其○室○已○虛○俚○俚○  
焉○不○可○得○見○悵○然○如○有○望○忽○然○值○於○非○意○之○頃○禮○之○  
而○不○荅○叩○之○而○不○應○刺○船○而○逝○使○吾○惘○然○若○失○而○卒○  
不○得○所○聞○則○吾○其○幾○矣○吾○未○可○以○行○乎○江○潭○之○濱○坐○  
乎○緇○帷○之○林○而○反○以○疑○漁○者○不○足○與○澤○畔○林○間○之○見○  
者○比○吾○猶○如○此○而○何○怪○乎○昏○昏○者○之○舉○以○漁○者○爲○漁○  
是○則○雖○不○丹○楫○之○事○罟○網○之○爲○而○以○漁○自○著○其○號○蓋○  
有○所○存○矣○彼○其○姓○名○非○徒○後○將○不○得○傳○而○世○且○莫○之○



爲意而吾獨得而知之故爲之記

夏鍾曰說漁父漁者賓主各各不同到底無一語不真無一語不幻入世出世入皆當悟此

陟岵增募記

觸於外而動於中。其人之至情乎。形象生色。盈乎天地之間。錯峙而林立。淆陳而全出。跡之所履。身之所到。何往而不值於目。而或一形一色。偶接而驟擊。若有樓之而使從。激之而使奮。怵心驚慮。恍焉而不自知其所以然。而平日之所憂思鬱積。跂想慨慕者。勃然而起。浩乎其不可制。則凡岡巒林麓。原埜墟井。水泉土石。草木蟲鳥。有鉅有細。惟其一值於目。而忽有

以動於其中。至其反究而徐觀之。則非岡巒林麓。原  
塹墟井。水泉土石。草木蟲鳥之能生人之情也。然非  
岡巒林麓。原塹墟井。水泉土石。草木蟲鳥之值於日。  
則情亦莫適爲感而生也。茲其所以爲情之至乎。人  
情之尤至者。莫如母子之間。而善道人之情者。風人  
之言也。魏風之詩曰。陟彼坻兮。瞻望母兮。何陟不可  
望母。而望母必以坻。何坻不可以望。而必以望母。茲  
其所謂觸於外而動於中。勃然而起。浩乎其不可制  
者耶。且夫高土多石。崔嵬而崑巖。蒙茸之所蔽翳。喬  
灌之所衣被。升危而睇遠。亦何與於母。而目之所視。



無他見者其人固有不得自知而亦不能自爲言者。彼不能言而詩人爲之言。此詩之所以爲通於人情。而爲風人之作也。今使世之有母而不得事者。必於此焉陟而望之。又非得此而陟之。則必無以望其母也。如是而以學詩。豈不爲謬且愚哉。苟有善學詩者。篤於親而不忘。飲食寢興居作行止。無非親之爲思。則庭戶几間。莫非此也。雖不升高而睇遠。固與陟此之風。所詠其人者。均其孝矣。嶺南歸善葉生某。蚤失母。念之而不能忘也。游學四方。經行燕趙齊魯吳楚。聞越故墟。以與其賢士大夫游。挾冊講誦。至於陟此。

之詩。蹙然而動。泫然而出涕曰。是詩也。其先爲我言之。與。因取其意。題其所寓之舍曰。陟屺增慕。曰。使我無忘。是詩。以知不忘吾母也。嗚呼。如葉生之於親。可謂篤矣。其於詩。可謂有合矣。非所謂謬且愚者也。葉生過泉。因介謁予。乞文。其詞甚悲。嗚呼。人有母而不得養。而能不忘其思。予顧靳於文也。其無愧於風人乎。故爲之記。

夏鍾曰。調高氣悲。波瀾獨老。















